

固原州志序



固原州志乃進士楊經所
輯而裁正於前總制尚書
晉溪先生事簡而核辭辨
而經其諸山川險易地里
迂直疆畔廣狹尤秩秩然

嘉靖辛卯之冬敬奉

天子命秉鉞而至首務考據
方輿揆敘形勢乃縮而諦
觀之憮然嘆曰薄伐獫狁
至於大原其在斯乎稽于
前代置州置軍置總管置

郡而復置州不一也

國朝初置千戶所成化三
年徙開城縣于中撤所置
衛弘治十五年改開城縣
爲固原州先是開府諸公
咸曰形勝之地在此爾是

故樹管結柵增戍徙丁轉糧聚糗中達大將而遊擊操備亦罔不備官將非謂兵之利地之助乎予昔年作兵備題名記亦曰三邊據險固原居中左顧則赴

援綏靈右顧則迎應甘涼是謂四塞之接也殆取乎昔人中華襟帶之論云爾既誦先生守邊議曰固原四通八達土曠而勢分形勝惡乎在邪由州而北三

國曆志序
百里曰下馬房關又三百
里曰花馬池長塹連山迂
縵峻極是則可以設險矣
上計興工大募徒兵卽關
之東西塹山堙谷池之左
右築壘䟽溝踰年迄用告

成復議曰此守在四夷之
道也自茲固原兵可撤備
糧可減輸守遠守近其攻
固較然哉夫諸公之計先
生之策志載之至詳也兵
法曰知戰之地則可千里

而會戰又曰不知山林險阻沮澤之形者不能行軍是故不可不審也夫知言之要理而已矣制敵之本勢而已矣籌邊君子覘諸虜所出沒之衝抑審我兵

設伏張竒拒守擊戰險要何在也于是先據不可勝之形以為可勝之勢執百二之樞峻山川之防制四夷之命殆不出乎志矣
嘉靖壬辰孟春初吉

賜進士第總制陝西三邊地
方軍務兵部尚書兼都察
院右都御史漁石唐龍撰

明固原州志目錄

卷之一

城池

疆界

山川

古蹟

土產

風俗

文武衙門

固原州

戶口

稅糧

固原州儒學

固原州倉

永寧驛

固原巡檢司

固原鹽引批驗所五廠

陰陽學

醫學

僧正司

道正司

長樂監 開城苑 廣寧苑 黑水苑

固原衛千戶所城堡

總制邊務大臣

鎮守固原武職大臣

分守固原參將

固原等處遊擊將軍

整飭固原兵備憲臣

守備固原武臣

固原州并所屬官

固原衛并守禦千戶所官

人物

婦

卷之二

前代原州人物

前代名宦

詩

送項都憲平虜凱還集句

西行至固原

題固原鼓樓

偕寇中丞登固原鼓樓次韻

嘉靖己丑夏六月兵過預望城

過開城

巡邊寫懷

固原志目錄
二
彭陽城曉行
登須彌山閣

記

重修朝那秋龍神廟記

重修顯靈義勇武安王廟記

創建城隍廟碑記

乾鹽池碑記

靖虜衛右所察院記

打刺赤碑記

重建靖虜衛打刺赤城記

固原增修廟學記

固原州增修廟學記

固原鎮鼓樓記

固原州行水記

重修北亂池龍神碑記

兵備道題名記

平虜碑記

序

平虜凱旋詩序

西征紀行詩圖序

賀平土番序

元老靖邊詩序

靖邊詩序

平夷退虜賀狀

奏議

設險守邊大省勞費

設重險以固封守

甘露降固原

明固原州志卷之一

創建州治

進士楊經纂輯

弘治十五年總制軍務戶部尚書秦紘駐節固原奏改開城縣為固原州初開城縣設在固原之南四十里洪武初固原止設巡檢司正統十四年北虜阿渠寇陝西平涼景泰元年始築固原城調洮岷臨鞏等衛官軍於固原操守令都指揮榮福往來提督三年調平涼衛右千戶所全伍官軍於固原立為守禦千戶所調靖虜衛署指揮僉事張正掌所事榮福仍統理之天順五年以平涼衛指揮使哈昭守備固原成化三

靖邊詩序

平夷退虜賀狀

奏議

設險守邊大省勞費

設重險以固封守

甘露降固原

明固原州志卷之一

創建州治

進士楊經纂輯

弘治十五年總制軍務戶部尚書秦紘駐節固原奏改開城縣為固原州初開城縣設在固原之南四十里洪武初固原止設巡檢司正統十四年北虜阿渠寇陝西平涼景泰元年始築固原城調洮岷臨鞏等衛官軍於固原操守令都指揮榮福往來提督三年調平涼衛右千戶所全伍官軍於固原立為守禦千戶所調靖虜衛署指揮僉事張正掌所事榮福仍統理之天順五年以平涼衛指揮使哈昭守備固原成化三

年北虜內侵攻破開城縣知縣于達教諭湯敏死之因徙縣治於固原成化四年土達蒲四反據石城都御史項忠討平之遂會巡撫都御史馬文升奏改固原守禦千戶所為固原衛立左右中三千戶所六年馬文升又奏添陝西按察司僉事一員楊勉整飭固原兵備又奏設西安州守禦千戶所成化十九年巡撫陝西都御史余子俊奏設鎮戎守禦千戶所又奏設平虜守禦千戶所皆隸固原衛

洪武初設立陝西等處承宣布政使司西安等八府并所屬州縣其在北邊者自西至東亘千餘里有曰蘭州曰金縣則屬臨洮府曰安定縣曰會寧縣則屬鞏昌府曰靜寧州曰隆德縣曰開城縣今改固原州則屬平涼府曰環縣則屬慶陽府固原環縣北至寧夏靈州花馬池大約六百餘里中間多山谿草莽居民鮮少其地自古及今無郡縣之建北虜住牧黃河套離花馬池營僅二十里每大舉深入必先犯固原而後至平涼鳳翔臨鞏黃河套即古河南朔方之地周宣王時獫狁內侵至于涇陽命尹吉甫將兵伐之至于大原原之名始

國原志
見于此乃雍州涇河北之大原非冀州汾水所出之太原也後魏於此置原州廢唐武德初復置原州皆因大原之舊名宋改為鎮戎軍金為鎮戎州而涇原之名不廢綱目書唐真元三年冬十月吐蕃城故原州而屯之故原之名始此今名固原音同而字不同也

城池

景泰三年苑馬寺奏修固原城成化五年兵備僉事楊勉增築建樓鋪城門二南曰鎮夷東曰安邊弘治十五年尚書秦紘增築外關城周圍

二十里設關門四外為溝池深闊各二丈復開城西一門曰威遠

按宋真宗咸平中曹瑋築鎮戎軍城周圍九里七分壕塹二重深二丈金宣宗興定三年六月十八日地震城頽四年四月二十一日起夫二萬人築完有石碣在今城隍廟內今固原州城皆其故壘

疆界

東至鎮原縣二百四十里
南至隆德縣一百二十里
西至會寧縣三百六十里

北至寧夏韋州界三百里

凡作州縣志者多志分野與形勝今固原州分野見平涼府志故州志不書統于一也若今固原境界四面相距各五百里土曠人稀四通八達難以拒守不可以形勝言舊志以李繼和所奏中華襟帶為固原形勝過矣唐置原州後沒于吐蕃宋韓琦會兵數萬趨鎮戎軍拒趙元昊為其所敗我朝自弘治十五年設總制于固原增兵添戍勞費無算而勢分力弱虜每大舉深入卒不能禦以此觀之固原之形勝安在

我左傳昭公二十三年楚子常城郢沈尹戌曰郢苟不能衛城無益也古者天子守在四夷天子卑守在諸侯諸侯守在四鄰諸侯卑守在四境慎其四境結其四援民狎其野三務成功民無內憂而又無外懼國焉用城今吳是懼而城于郢守已小矣至哉斯言也楚以守郢為小我

國家大一統全陝之北盡朔方靈夏之境皆歸統御而議者拘拘以固原一州為守不尤小乎昔周宣王命尹吉甫城朔方以除玁狁之患正守在四夷之義惜後人弗之

考也今奉

聖天子明命於寧夏花馬池東西三百里皆為
深溝高壘屯兵拒守又於近裏地名下馬
房東西三百里塹山湮谷設立重門以待
非常正得守在四夷之上策而固原草莽
之區衛所之增置兵馬之調集供輸之困
弊皆可裁省矣蓋守近守遠利不利懸絕
如此謀國者可不慎之于初哉

山川

大六盤山在州西南一百一十里

臺山在州南四十里

馬髦山在州西南四十里宋元嘉五年夏主昌
被擒其弟平原公定奔平涼郡卽帝位魏兵
追之三月敗於馬髦嶺卽此元和郡縣志作
馬屯山誤

須彌山在州北九十里上有古寺松栢桃李鬱
然卽古石門關遺址

砲架山在州西北一百二十里石城之前四壁
削立極為險峻成化五年滿四反據此山

照壁山與砲架山相連

香爐山在州南四十里

清水河在州西南四十里發源六盤山下至鳴

沙州入黃河

大黑水在州北一百一十里流入清水河

小黑水在州北八十里流入大黑水

須臾都河在州北九十里流入小黑水

硝河在州北一百里流入須臾都河

海子河在州西南三十里流入硝河卽西海之

流波也

東海在州東南四十里泉流有聲廣五里闊一

里東岸有廟餘波入清水河卽古朝那湫

西海在州西南四十里山腰有泉眼東西闊一

里南北長三里北岸有廟舊傳祭龍神潤澤

係處正德十一年鎮守總兵官趙文兵備副

使景佐因本城井水苦鹹人病於飲遂導引

於州城由西門而入環流於街巷自東門而

出入清水河卽古朝那湫

北亂池在州西南九十里闊一百七十丈莫測

其深旱魃禱雨輒應有胡元時及

國朝正統年碑

養魚池在舊開城西三里元安西王養魚處又

名蓮花池

暖泉在州北五里隆冬不凍流入清水河

青羊泉山山頂有泉故名在平虜所西四十里

印子山絕頂有印跡如篆刻狀故名在紅古城西南十里

甜水河在紅古城西門外味甘可飲且便於灌溉居人引之以種稻去紅古城二十里入清水河

大南川在州東南七十里

小南川在州東南六十里

乾川在州東北一百六十里

古蹟

立馬城在州東一百四十里有遺址

西安州城在州北二百里宋元符二年置詳見

西安州下

東山砦在州東南四十里宋咸平中置金為東

山縣隸鎮戎州元改為廣安縣尋陞為州隸

開城路今廢為東山城堡

彭陽城唐為義豐縣宋改彭陽今為堡在州東一百二十里

細腰葫蘆砦城在州東北一百五十里通常州

靈夏諸處其路兩山相夾最為要害宋范仲淹以原州屬羌月珠滅臧二族兵數萬與元

昊隔絕隣道公聞涇原欲襲討之奏言二族道險不可攻前日高繼崇已嘗喪師平時猶

國原志 卷之七
懷反側今討之必與賊相為表裏南入原州
西擾鎮戎東侵環州邊患未艾也宜因元昊
別路大入之際卽并兵北取細腰葫蘆泉為
保障以斷賊路則二族自安而環州鎮戎等
處徑路通徹可無憂矣後二歲遂築細腰葫
蘆諸砦屬羌歸服金元以來城守漸廢今猶
存遺址云

秦長城在州西北二十五里有遺址綱目秦滅
義渠築長城以拒胡卽此地

定川寨在州西北二十五里宋置金省

天聖寨在州東北八十里宋置屬鎮戎軍

石城堡在州西北一百五里古有是堡莫知所
創四壁削立中有石井五各闊丈餘以貯水
惟一路可登地甚險窄成化四年土達滿四
等據之以叛次年遂毀其險隘以絕後患焉
今為廢城矣

開遠堡宋時置元陞為縣隸開城路
群牧監舊基在開城東南三里

平安寨在開城東一百二十里

第六將營大金時立莫考其所在

紅城子在州北七十里秦長城外今廢

耳朶城在州東北一百六十里宋慶曆中重修

今廢有遺址

圓城兒在白馬城東有遺址

磚城兒在白馬城東三十里有遺址

瓦亭關在州南九十里後漢隗囂使牛邯守瓦

亭卽此地漢文帝時匈奴入寇至朝那蕭關

疑卽今瓦亭關是

石硤口在紅古城西五里古嘗設關遺址猶存

土產

穀類

大麥

小麥

蕎麥

莞豆

匾豆

大豆

白穀

青穀

黃穀

紅穀

白糜

紅糜

青糜

黃糜

黑糜

胡麻

麻子

菜子

蘇子

菓類

桃

李

杏

榛

林禽

梨

秋子

冬菓

蔬類

蔥

韭

蒜

芥菜

芹菜

白菜

萵苣

蔓菁

蒼蓬

小蒜

茄子

白蘿蔔

胡蘿蔔

紅蘿蔔

藤蒿

王瓜

瓠子 蕨菜 薺

藥類

甘草 秦艽 芍藥 柴胡

知母 防風 羊須草 麻黃

蒼朮 草芽 野烏藥 菖蒲

枸杞 貝母 車前子

花類

牡丹 芍藥 薔薇 萱草

葵花 十樣錦 珍珠花 米殼花

地棠花 赤金盤 麗春花 黃金蓮

山丹花 石竹花 金盞花 馬蓮花

紫葉蝶 金銀花 玉簪花 紫荊花

紅荷 菊花

木類

松 栢 槐 柳

青陽 白陽 椿 榆

桑

豢養類

牛 馬 驢

羊 犬 豕 狐狸

貓 雞 鵝 鴨

鴿 駱駝

鳥類

鴈

鶴

鶯

鷹

燕

鷓鴣

鵲

野鷄

烏

鳩

雀

鷺

布谷

鷓鴣

山雞

鷓鴣

火燕

沙鷄

鴉

鷓鴣

獸類

兔

狼

狐

鹿

兔

獐

鼠

黃鼠

黃羊

野豬

計狸

跳兔

青羊

麝

風俗

元萬戶把丹據平涼洪武初歸附授平涼衛正千戶部落散處開城等縣仍號土達其民朴質強悍選為兵者類多驍勇善戰儒學之士通習五經文教漸興指揮等官有以軍功累陞至將官者風俗視內郡無大異焉

文武衙門

固原州在十字街東正廳三間戒石亭一座儀門三間大門三間左庫房三間右吏目廳三間東西六房各三間儀門左預備倉三

固原志
間右官倉三間獄房一所嘉靖五年知州
趙承祖重修初設知州一員吏目一員嘉
靖八年添設同知一員

原額七百七十三戶逃絕八十六戶見在六
百八十七戶

男子三千三百三十八丁凡十里

在城里 東山里 南川里 石仁里

新興里 榆林里 固原里 底堡里

彭陽里 新增里

夏稅一千八百三十石六合四勺

秋糧二千六百九石一斗六升二合四勺

草三千二百六十一束六斤十二兩七錢二分

固原州儒學在城內大街西弘治十六年總制

尚書秦紘建

固原州倉在城內西北初設直隸布政司嘉靖

八年改屬固原州大使副使各一員兼管

草場

添設平涼府監收通判一員

永寧驛在城內西南成化七年兵備僉事楊勳

建嘉靖五年副使桑溥重修驛丞一員

固原巡檢司洪武初設成化八年移開城後又

移涇州圪塔鋪

固原志
固原鹽引批驗所舊在州衙西弘治十一年移
於東關廂大使一員

五鹽廠弘治十六年總制軍務尚書秦紘奏設
東鹽廠在東關南北四十五步東西八十步
南鹽廠在南關東西三十二步南北一十六
步

西鹽廠在西關東西二十丈南北二十二丈
北鹽廠在北關南北二十丈東西六十二丈
後改為小教場

中鹽廠在西關東西十五丈南北三十五丈
陰陽學 醫學 僧正司 道正司

固原衛在大街西成化六年建正廳五間東西
六房各六間後廳五間大門東西廂房各三
間二門三間經歷司三間鎮撫司三間獄房
一所左右中三千戶所

本衛馬步官軍二千四百八十七員名

正兵營馬隊官軍一千一百一十三員名
馬隊五百三員名

步隊守城守墩雜差等項八百七十一員名
因堪戰軍止有一千六百故遇虜住套必
調集各衛官軍于固原助力因設墩數多
故占役軍人至八百之上然勞費雖多而

竟不能禦虜者因所守者小故也

屯田一千二百三十三頃四十五畝每年該
徵夏秋子粒七千四百三十七石八斗馬
草一萬一千一百五十七束一十二斤

教場在城東南三里周圍九里成化八年僉事
楊勉建弘治八年副使陶琰守備都指揮烏
銘種樹千株正德二年都督同知曹雄重修
正德十一年鎮守署都督僉事趙文於演武
廳後築望軍樓臺一座以防虜至據守

神機庫在城內大街北正德二年都督曹雄建
兵車廠在南門月城內嘉靖五年副使桑溥建

鼓樓在州城大街中僉事楊勉修築歲久傾圮
正德八年總制右都御史張泰兵備副使景
佐重修極雄壯取安定縣古寺巨鍾置樓上
鍾識云大宋靖康元年八月鑄起復修寺熙
河路兵馬鈐轄隴右都護馬祐昌

西安州守禦千戶所在州西北二百五十里宋
初為南牟會元符二年經畧使章粲始令太
守折可適建築之是夏四月賜名西安州領
堡寨二十二靖康元年夏人陷之元廢

國朝為楚府牧地成化五年巡撫陝西都御史
馬文升奏立西安州守禦千戶所隸固原衛

城周九里三分壕塹一道深闊各三丈池深闊與城等東西二門城四面有樓曰東寧西靖安南定北按察分司并千戶所操守衙門俱僉事楊勉建

官軍一千三百四十九員名馬隊四百四十四員名步隊九百五員名

屯田三百頃歲徵夏秋子粒一千八百石馬草二千七百束

鎮戎守禦千戶所在州北一百二十里宋紹興四年章察上言城葫蘆河川據形勝以備夏卽此地 國朝成化九年巡撫都御史馬文

升奏修城周三里高闊各三丈池深闊與城等東南二門成化十二年巡撫都御史余子俊始奏設鎮戎守禦千戶所隸固原衛成化十八年增設操守指揮一員嘉靖三年增築關廟周二里高闊各一丈五尺南北二門內有帥府察院及大小官廳操守廳

官軍一千一百六員名馬隊二百八十一員名步隊八百二十五員名

屯田三百頃歲徵夏秋子粒一千八百石馬草二千七百束

平虜守禦千戶所在州東北二百一十里成化

十二年巡撫陝西都御史余子俊奏設地無井泉惟蓄潦水供飲不堪多駐軍馬弘治十四年總制尚書秦紘修築城池及東西關弘治十七年總制右都御史楊一清奏請銓官降印募軍給馬隸固原衛城周二里三分高闊各二丈池深闊與城等闊周三里二分高闊各二丈○進士楊經曰平虜古有是城莫考所創相傳為豫王城考之元史順帝冬十二月丙寅朔豫王阿剌忒納失里徙居北海尋還六盤山北海疑卽今平虜城地故俗呼為豫王城云

官軍一千二百四十五員名馬隊五百三

十一員名步隊七百一十四員名

屯田三百頃該徵子粒一千八百石馬草

二千七百束

甘州群牧千戶所在州西二十里 肅府牧馬地城高二丈五尺周三里七分東南北三門嘉靖五年巡撫陝西都御史王蓋奏設操守官一員管領本所軍馬聽調殺賊

官軍九百二十八員名馬隊四百九十四

員名步隊四百三十四員名

海刺都營在州西北二百一十里 楚府牧馬

地洪武二十三年調撥武昌護衛前所六百
戶官軍一千五百員名屯牧於此舊無城池
權於乾城兒建立公署倉庫天順三年營人
始自築小城周二里高一丈餘成化四年巡
撫都御史馬文升始奏選本府官軍七百員
名冬操夏種設操守指揮一員約束之成化
七年兵備僉事楊勉始增築其城高闊皆三
丈周四里三分東西南三門池深闊各一丈
五尺內有大小官廳操守廳及承奉行司

官軍九百四十八員名馬隊四百五十七
員名步隊四百七十一員名

紅古城堡在州北二百二十里有古城址弘治
十七年秦紘奏立正德二年楊一清募軍戍
守奏調寧夏等衛百戶五員領之設操守指
揮一員坐堡官一員城周二里三分高二丈
五尺閣三丈西南二門俱秦紘建嘉靖五年
尚書王憲副使桑溥增築外關周三里二分
高闊如內城壕深闊各一丈五尺門二與內
門直於內城二門上各建有樓城內有大小
官廳及操守坐堡官廳

官軍七百九十員名馬隊四百四十四員
名步隊三百八十六員名

白馬城堡在州東一百二十里一名撒都兒城
本苑馬寺牧地有井泉嘉靖四年楊一清復
來總制築城周二里三分高二丈八尺闊二
丈七尺東北二關周五里三分東南北三門
上各有樓壕深二丈闊一丈五尺募軍戍守
人給地一頃使自耕種為業奏調榆林衛百
戶五員領之

下馬房關在固原北三百里下馬房東自定邊
營南山口起西歷榆林所管石滂池堡饒陽
堡三山堡環縣所管憇水堡關固原所管地
名嚮石溝下馬房關紅古城堡靖虜衛所

管乾鹽池打刺赤地名青沙峴至靖虜衛
延五百三十餘里中間山勢連絡可以設險
弘治十七年尚書秦紘奏起陝西八府民夫
鏹山挑溝設險以備胡未久冊塞十八年正
月虜賊大舉入寇圍困靈州等處十二月十
七日自花馬池清水營兩處拆牆進入由下
馬房嚮石溝直至固原隆德縣靜寧州會寧
縣搶掠二十八日由西安州出境下馬房山
溝險隘止一路通寧夏鞏州上置關門無人
據守嘉靖五年尚書王憲奏築小城周一里
欲調軍守之事未就嘉靖九年尚書王瓊令

鎮守都督劉文領軍八千於下馬房東嚮石溝挑空壕塹三十里五分深闊各二丈五尺南面塹上築牆高五尺共三丈之數又於靖虜衛打刺赤北青沙峴四十里三分隨山就崖鏟削陡峻其餘但係通賊隘口俱修理阻塞凡一百六十四里又將環縣憇水堡至石澗池堡靖虜至蘭州要害之處皆築牆挑溝設險以守下馬房關起蓋城樓營房撥軍守之懸榜于樓上曰重門禦暴于憇水堡關樓上曰北地重門于蘭州刻石曰千里巨防

論曰環縣固原北至寧夏花馬池靈州六

百餘里土曠人稀自古無郡縣之設志地里者曰環曰原而已殊不知環原之北三百里東西山勢連絡自榆林黃河至蘭州黃河凡二千餘里中間深溝懸崖逶迤相接可以阻隔胡虜者十之六七平漫可通行者十之三四耳以在環原境上者言之自環縣憇水堡關至靖虜衛凡五百餘里中間平漫可以挑塹鏟崖者七十餘里皆畧加鏟削用力不多而險成矣宋趙元昊據靈夏命范仲淹守鄜延韓琦出兵鎮戎軍以禦之敗績蓋不知守環原北面形

勝阨塞之地而欲以攻戰先之是以終宋
之世不能免夏人之侵也

本朝於靈夏之地建衛屯兵命將拒守而設
險之策未遑講究既添設固原衛倚以為
重又增置西安平虜鎮戎三千戶所紅古
城白馬城二堡銓官募軍以備北虜之入
所守已小而益小為費已多而益多無恆
乎虜之不能禦也今

天子明聖屈盡群策於花馬池東西三百里皆
為深溝高壘據而守之所謂天子守在四
夷者是已又於下馬房東西三百里塹山
湮谷設立重險所謂重門擊柝以待暴客
者非是之謂乎其視於固原曠漫之野增
兵添戍勞費無益者得失豈不較然明著
矣乎

苑馬寺所屬坐落固原州地方監苑

長樂監在州城東北隅監正一員錄事一員
有苑馬行寺馬神廟所屬在固原者三苑
開城苑在頭營內圍長三員領八營馬房六
百三十九間草廠八所草場馬圈一十三
處二營內置有苑馬行寺東至可可川天
城山私蓋路南至古黑城抵廣寧苑西至

國原志
須彌都把關山北至

韓府群牧所抵中營灣三峯兒堆南北長一百二十六里東西闊八十里

廣寧苑在州城內監衙西圍長二員領鞏昌青州臨洮平涼四營馬房四百五十四間草廠四所草場馬圈三十六處東至北河川南至木廠溝西至武原川北至開城苑頭營東西長一百里南北闊五十里

黑水苑在州城北九十里圍長二員馬房三百九十七間草廠二所草場馬圈九處內有苑馬行寺東至紅城子大路南至深溝

民楊鑑地北至亂堆溝成化十三年巡撫都御史余子俊奏設正德元年楊一清開拓城堡嘉靖五年王憲奏撥秦鞏等衛官軍六百員名戍守後因戍軍奏路遠艱苦停罷

總制邊務大臣

弘治十四年虜酋火篩大舉由花馬池入寇平鳳臨鞏十五年兵部建議設大臣一員開府固原總制延綏寧夏甘肅陝西四鎮軍務以備虜

秦紘山東單縣人景泰辛未進士由御史歷陞

都御史巡撫山西宣府河南總督漕運及兩廣軍務所至搏擊權豪風裁茂著以南京戶部尚書致仕弘治十五年用廷臣薦起用改戶部尚書兼都察院左副都御史總制陝西三邊軍務奏陞開城縣為固原州選將練兵疏通蓋利修理孔廟以興學開拓城郭以安軍於下馬房東西阨塞之地棧崖挑塹設險以守在固原三年北虜未嘗入十七年召還掌戶部事尋卒

楊一清雲南安寧州人寄籍湖廣巴陵縣後又入籍鎮江府丹徒縣十二歲以奇童舉送翰林院讀書成化八年登進士第除中書舍人陞僉

事副使提督山西陝西學政教條嚴謹人以有政事才目之入為太常卿陞左副都御史督理陝西苑馬寺馬政弘治十八年正月巡撫陝西地方是月虜賊大舉入寇圍困靈州等處尋命一清總制陝西延綏寧夏甘肅邊務十二月虜賊大舉由花馬池入寇固原安會等處認罪建議於花馬池營立寧夏後衛興武營立守禦千戶所改靈州千戶所為守禦千戶所屬陝西都司奏築定邊營至橫城墻三百里發八府各衛丁夫九萬人築完橫城堡墻三十里丁夫潰散會劉瑾用事取回後以少傅兼太子太傅吏部

尚書武英殿大學士致仕嘉靖五年起用復任
陝西總制未一年復入內閣嘉靖八年以事革職
冠帶閑住卒于家有督府奏議印本在兵備道
才寬直隸遷安縣人成化戊戌進士正德四年
以工部尚書總制陝西三邊軍務時大虜住套
帥師由興武營出遇賊斬首數十級忽伏兵起
中流矢卒于軍事閑廕子錦衣衛百戶世襲
張泰直隸肅寧縣人成化戊戌進士正德六年
以都察院右都御史總制陝西三邊軍務八年
卒于固原

鄧璋直隸涿州人成化丁未進士正德九年以
都察院右都御史總制陝西三邊軍務時都御
史彭澤總督甘肅等處軍務處置哈密事情約
璋赴甘州會議虜賊大舉由花馬池入寇固原
直至隴州致仕後官至南京戶部尚書

李鉞河南祥符縣人弘治丙辰進士嘉靖元年
以兵部左侍郎兼都察院左僉都御史巡視三
邊後改總制虜賊大舉由花馬池入寇固原直
至涇州降

旨切責榆林遊擊將軍彭模於定邊營南山追
賊斬首八十級復受獎賞三年取回京陞本部
尚書未幾卒

王憲山東東平州人弘治庚戌進士原任兵部尚書致仕嘉靖五年起用兼都察院右都御史提督陝西三邊軍務六年六月虜賊千餘由花馬池入寇黑水苑未至固原九十里先是已調榆林等處兵二萬分布固原境內賊至各路兵會合擊之斬首三百餘級捷聞降

勅獎勵加太子太保廕子錦衣衛百戶世襲七年改南京兵部尚書叅贊機務八年改都察院左都御史有督府奏議印本在兵備道

王瓊山西太原縣人成化甲辰進士正德八年任戶部尚書改兵部尚書後改吏部尚書少師

兼太子太師十六年為權奸構害謫戍上郡嘉靖六年復兵部尚書職致仕七年起用兼都察院右都御史提督陝西三邊軍務後改總制時土魯番不靖侵擾肅州督兵擊斬走之奏放節年羈留貢使千人回本土番夷畏服朝貢如常八年套虜犯邊六月統兵三萬出花馬池禦之斬首六十三級蒙降

勅獎勵賞銀五十兩紵絲四表裏又賊二萬東由把都河堡入境發兵禦之出境又賊二千由興武營入寇靈州發兵擊之退走以平夷退虜功加太子太保九年洮岷番夷若籠等族反寇

掠鞏昌等處議令鎮守都督劉文遊擊將軍彭
斌領兵討之斬首三百五十餘級撫定七十餘
族通貢如舊蒙降

勅褒獎賞銀五十兩紵絲四表裏十年巡視定
邊營花馬池提督官軍挑挖壕塹賊知有備率
衆二萬東由鎮靖堡入時秋九月人畜已收斂
野無所掠迨回建議於花馬池東西三百里盡
為溝壘罷戰設守以省勞費於花馬池置關門
起樓扁曰朔方天塹又於環縣憇水堡起至蘭
州止東西八百餘里因地形勢塹山埋谷設立
重險益固封守修理憇水堡關門起樓扁曰北

地重門下馬房關門起樓扁曰重門禦暴又奏
脩寧夏鎮城北平虜城一帶墻塹東西長三十
二里置立關門起樓扁曰朔方天塹內築二堡
移軍屯守有環召新疏九卷凡一百九十二條
又自著西夷事跡一卷北虜事跡一卷印板俱
在總制府書厨收貯

唐龍沂江蘭谿縣人正德戊辰進士由御史辛
巳七月陞陝西提學副使至嘉靖丙戌十一月
歷陞山西按察使太僕寺卿漕運僉都御史掌
院事副都御史吏部右侍郎左侍郎辛卯九月
陞兵部尚書兼都察院右都御史總制陝西三

邊軍務管理西安等府賑濟兼制河南湖廣山西三省

鎮守固原武職大臣

初設武職大臣與太監一同鎮守陝西操練軍馬撫安兵民修理城池防禦賊寇凡事與巡撫都御史公同計議而行弘治十八年十月巡撫陝西都御史楊一清奏稱

固原志 卷之三
鎮守陝西武安侯鄭英怯懦失事取回薦
舉都督曹雄鎮守移任固原候邊城無事
仍回鎮城住劄

曹雄都督同知弘治十八年鎮守固原寧夏指
揮何錦等反殺死鎮巡官雄領兵駐靈州欲渡
河向寧夏遊擊仇鉞借其聲援擒何錦等事平
後以劉瑾鄉親誣誤充軍

韓玉都督僉事正德六年鎮守

楊英都督同知正德八年鎮守

侯勲都督同知正德九年鎮守因套虜犯固原
叅提病卒

趙文署都督僉事正德十一年鎮守套賊入寇
安定會寧又因別事被劾革任

劉淮都督僉事先任鎮守宣府總兵官失事降

級後復職正德十六年鎮守固原嘉靖元年套

賊犯涇州革任今又推用鎮守遼東總兵官

鄭卿署都督僉事嘉靖二年鎮守固原六年以

鎮戎之捷陞都督同知以洮岷事被劾革任

張鳳先任都督僉事右軍都督府僉書嘉靖三

年任榆林遊擊調涼州殺賊有功陞都督同知

六年鎮守固原未幾與魯經更調鎮守榆林

魯經都督同知莊浪衛土官嘉靖七年尚書王

國原志
憲薦舉鎮守榆林大學士楊一清奏調鎮守固
原套賊由花馬池至靖虜衛青沙峴入寇安會
督兵截殺斬首三十餘級後以足疾辭任

劉文先任涼州副總兵嘉靖八年陞署都督僉
事鎮守固原九年兆岷番夷若籠刺卽等族反
寇掠鞏昌等處統兵征勦斬首三百五十餘級
撫定七十餘族地方平定陞俸一級賞白金綵
幣秋督軍修完下馬房東嚮石溝及乾鹽池青
沙峴要害墻塹七十餘里剗削崖塹一百六十
四里陞實授都督僉事仍賞白金綵幣食一品
俸靖虜衛起至蘭州長三百里中間要害去處
又皆修築墻塹以斷胡虜西入臨鞏之路
分守固原參將

嘉靖四年總制尚書楊一清奏設九年改
分守蘭靖常在蘭州住劄固原參將裁革
劉文嘉靖四年任陞涼州副總兵轉固原鎮守
李佐嘉靖六年任以疾辭任卒
苗鑾嘉靖八年任改分守蘭靖
固原等處遊擊將軍

弘治十五年總制尚書秦紘奏設常在慶
陽環縣北紅德城住劄嘉靖九年改陝西
遊擊將軍省城住劄往來固原等處殺賊

陳善

姚振

李佐

張雄

張鎬

張環

雍斌

陶文

夏欽

彭械

整飭固原兵備憲臣

成化五年巡撫都御史馬文升因土達蒲四反奏設專一在於固原高橋靖虜等處往來巡歷撫安土達仍整飭固靖甘蘭兵備操練軍馬修理城池墩臺關堡防禦賊寇無理詞訟糧儲

楊勉四川安岳縣人由進士成化五年任事方創始悉其經營

嚴憲河南扶溝縣人由進士以僉事成化十一年任兵備

邊完河南杞縣人由進士以副使成化十三年任兵備

翟廷蕙河南洛陽縣人由進士以副使成化十五年任兵備

王繼河南祥符縣人由進士以監察御史陞副使成化十八年任兵備累官至右副都御史巡撫甘肅南京兵部尚書叅贊機務卒

孫逢吉山西渾源州人由舉人成化二十年任兵備值歲凶賑救有方人多德之

李經山西陽城縣人由進士以監察御史陞副使弘治二年任兵備為守備都指揮張欽所怨幾被害致仕

陶琰山西絳州人由進士以副使弘治七年任兵備屢官至都御史刑部侍郎工部尚書加太子太保致仕

胡倬廣西桂林縣人由進士弘治十四年任兵備

陳珍遼東廣寧衛人由進士弘治十五年任兵備

胡經山東濱州人由進士以副使弘治十五年任兵備

高崇熙山西石州人由進士以副使弘治十七年任兵備後官至右副都御史巡撫四川

王凱直隸蠡縣人由進士以副使正德四年任兵備

黃繡江西清江縣人由進士以副使正德五年任兵備

景佐山西蒲州人由進士以副使正德六年任兵備

羅珰河南扶溝縣人由進士以副使正德十一年任兵備

許諫河南洛陽縣人由進士以副使正德十二年任兵備

毛思義山東信陽縣人由進士以副使嘉靖元年任兵備獄訟立決人服其明歷陞右副都御史總督漕運

成文山西山陰縣人由進士以副使嘉靖二年任兵備政尚平恕人咸德之歷陞右副都御史巡撫遼東

桑溥山東濮州人由進士以副使嘉靖四年任兵備有治事才在州三年修理城垣倉場公署驛鋪成樓坊市煥然一新風紀振揚奸盜屏息

又能設法價銀差義官夏景榮收買銅三千餘斤鑄造廟學祭器四百四十餘件六年以鎮戎之捷陞浙江按察使

郭鳳翔河南祥符縣人由進士以副使嘉靖七年任兵備蒞事公勤屢經薦舉十年考滿便道省親卒于家

沈圻浙江平湖縣人由進士以副使嘉靖十年任兵備

守備固原武臣

景泰元年始築固原城令都指揮榮福往
來提督三年立固原守禦千戶所天順五
年始設守備操練軍馬修理城池撫恤土
遠防禦賊寇後用指揮守備成化五年都
御史馬文升奏復用方面官守備嘉靖四
年裁革十年復設

榮福都指揮僉事景泰間往來提督

哈昭都指揮僉事天順五年守備固原成化二
年大虜入寇率兵出戰沒于陣

馬傑指揮同知成化四年土達滿四反事連沃

誅

樊盛都指揮僉事成化五年守備

常謙都指揮僉事成化六年守備

甘澤都指揮僉事成化七年守備凡十有八年
守備領

勅自澤始

張欽都指揮僉事弘治二年守備因謀殺副使

李經自刎

郭鈞都指揮僉事後陞都督僉事鎮守寧夏

馬榮都指揮僉事後陞涼州東路叅將

烏銘都指揮僉事後陞延綏東路叅將

楊宏都指揮僉事弘治十四年因大虜寇固原

充軍總制尚書秦紘奏免充軍累立軍功陞都

督僉事鎮守四川革任後充總兵官鎮守淮安

督理漕運

苗英都指揮僉事弘治十七年守備

趙洪都指揮僉事

陳善都指揮僉事後陞固原遊擊將軍

陶文都指揮僉事後陞固原遊擊將軍

趙瑛以都指揮體統行事指揮正德十四年守

備累陞都督僉事鎮守宣府後調寧夏鎮守北

虜寇掠鎮城境內革任

楊振都指揮僉事正德十六年守備嘉靖元年

北虜寇掠隆德等處革任十年推舉陝西都司

掌印

劉文都指揮僉事嘉靖二年守備裁革總制尚

書楊一清保陞固原參將

周繼勳指揮使以都指揮體統行事嘉靖十年

守備

固原州并所屬官

知州 弘治十五年除

岳思忠河南儀封縣人弘治十五年初任

洪恩四川成都縣人由舉人正德元年任本州

民糧舊起運寧夏邊倉恩奏留本州倉交納州

民便之

石堅山西介休縣人由監生正德三年任

張洪山東曹縣人由舉人正德七年任

嚴玘河南陳州人由舉人正德九年任

張經山東濱州人由舉人正德十二年任

王龍直隸東鹿縣人由舉人正德十五年任

趙承祖山西介休縣人由舉人嘉靖四年任撫
字民安

同知 嘉靖七年添設

李承宣山東安丘縣人由監生原任綏德州同
知嘉靖七年裁革調本州

孫爵山西壽陽縣人由吏員嘉靖八年巡撫以
才幹保陞

吏目

李玉山東人由監生任

郭英直隸香河縣人由監生任

張鼎山西朔州人由監生任

盛景監生任

李逢陽山西石州人由監生嘉靖六年任

本州儒學

學正

李佐四川潼川州人由監生任

周价四川巴縣人由監生正德十六年任學規
嚴整後陞鞏昌府儒學教授

丁琰山西聞喜縣人由監生任

李鷗四川茂州衛人由監生嘉靖六年任風度
文雅後陞臨洮府儒學教授

申一鸞山西臨汾縣人由監生除訓導陞任

訓導

王謨

劉謨山西臨汾縣人由監生任

符節湖廣鈞州人由監生任

陳蒲河南閔鄉縣人由監生任

劉智山西河渠縣人由監生任

蔣倫河南原武縣人由監生任

李澄四川塩亭縣人由監生任

胡貫四川巴縣人由監生任

李宗義山西陽曲縣人由監生任

羅袞四川宜賓縣人由監生任

馬元四川華陽縣人由監生任

武威山東樂陵縣人由監生任

毛鳳起四川宜賓縣人由監生任學博行方士

子巖憚

魏世禎河南睢陽衛人由監生任

朱崇易四川新寧縣人由監生嘉靖六年任陞

麟遊縣儒學教諭

國原衛并守禦千戶所官

國原衛

張愷都指揮僉事任蘭州守備

黃海指揮使功陞都指揮僉事

王爵都指揮使任甘肅遊擊將軍

楊振都指揮僉事任固原守備革任復陞

陝西都司掌印

趙景署都指揮僉事任靖虜守備

王佐襲父爵職功陞都指揮僉事

楊信署都指揮僉事甘州領班備禦

黃振襲父海職以都指揮體統操守固原

指揮使 胡琮 張瑛 李臣

指揮同知

劉東 趙欽 李勇 申甫

指揮僉事

陳經 曹隆 郭完 晏灝

孟澤 田國 楊琮 汪洋

黃雄 徐源

左所正千戶朱璉

副千戶陳源 楊文學

百戶方鸞 吉佑 蔣仁 王隆 薛良

張添福 李堂 蔣天爵 劉琦

右所正千戶尹福

副千戶任經 唐鸞 單清 張祿

百戶柳洪 高鳳 趙奉 李江 馬騰

阿勳 王仲 唐西 王堂 馬名

中所

陳英 馬得福 王隆 李得隆

副千戶符節 陳準 梁鳳 甘昇 陳完

徐傑

百戶高隆 王臣 崔振 呼鉞 蔣鸞

高嵐 黃倫 尚恩 劉繼先

西安州守禦千戶所

千戶方良甫 吳宏 成威

百戶楚玉 蕭謙 蔣善 李讓 陳鑾

劉源 李縉 韓義 王傑 裴愷

鎮戎守禦千戶所

千戶賈燧 馬玄 張諫

百戶仇西 徐欽 馬恩 李珣 周縉

白璽 謝陞 徐泰 余欽 賀朝

平虜守禦千戶所

千戶薛福 萬章 韓傑 翟勳

百戶王玉 蔣鎮 倪松 瞿鐸 趙琛

人物

劉仲祥開城縣人以人才薦除直隸無錫縣

知縣

王旻開城縣人永樂年中舉

何居恭開城縣人永樂年中舉除四川保寧

府通判

楊可度開城縣人永樂年中舉

章文開城縣人天順年中舉除山西祁縣知縣

虎繼宗開城縣人正統年中舉

彭璘固原州人弘治十七年中舉除灤州知州陞太平府同知

開城縣儒學歲貢監生

王亨除山東丘縣知縣

何文郿除四川保寧府照磨

翟頭

白珪

曾讓除山東高密縣丞

王文秀直隸滄州判官

李廷芳直隸平山縣儒學訓導

曾友直山西太原縣知縣剛直廉幹民謠曰有曹廉使曾知縣鄉間鷄皆養白頭了言里胥不敢下鄉科擾鷄犬亦得寧也

馬良山西榆次縣知縣

白玉山西垣曲縣主簿

張信河南舞陽縣主簿

田福四川眉州吏目

李恕河南太康縣主簿

馬馴

張善

韓斌河南信陽州吏目

楊存揚可度子山西沁水縣主簿

馮泰山西榆次縣主簿

陳寧大興縣主簿

康鑑河南淇縣縣丞

翟紳翟顛子山東福山縣主簿

徐恒廬州府檢校幼時出遊海刺都見女子

三十不嫁問之云

楚王有禁不得嫁非本府人心不平及為諸生

陳其事遂弛其禁又嘗上言錢法利病及

防邊廢事多見采納位卑不究其用

胥泰山西河津縣縣丞

張寅山東萊州府教授

施文

袁鏗

李愷四川忠州判官

馬恕四川南川縣主簿

陰順山西平定州吏目

馮浩四川永川縣主簿

蘇勉

彭銳

胡秀四川蒼溪縣訓導改雙流縣

袁瑾四川仁壽縣訓導

國原志
卷之三
翟琇 翟紳子 河南鈞州判官

楊獻之

劉綱

張翔 山東高遠縣教諭

張恭 江西九江府檢校

張洪 鴻臚寺序班

固原州儒學歲貢監生

王璋 河南泌陽縣教諭

白文 繪上林苑錄事

楊欽 河南縣縣丞

翟璣 翟紳子

陰廷鳳 陰順子 四川武隆縣主簿

陳夔 河南睢州吏目

張正學

陳言 江西按察司照磨

張錦 四川南部縣主簿

崔紀 河南臨漳縣教諭

徐尚忠 徐恒子 山西芮城縣主簿

史熈 四川會川衛經歷

王英

胥保

胡子鈺

陳介

彭鉉

王鉉

馬文輝

康時亨

趙夔

徐尚 養學

蔣翺 長蘆運司經歷

趙宏

安宣

國原志 卷之九
康雄康鑑子四川巴縣縣丞

孫成浙江處州府檢校

趙英四川資陽縣主簿

王鳳

李憲

梁材

趙寅

任錫

黃繡

陳簡

徐遷

節婦

趙氏固原州民馮宜妻年二十三而寡家素

貧趙撫育幼子銘鎮不再嫁年八十四終

楊氏固原衛人彭珪妻年二十四而寡家貧

無依甘貧守節誓不再醮嫁年七十有七

明固原州志卷之一

明固原州志卷之二

前代原州人物

進士楊經纂輯

魏

紇干弘字廣略原州長城縣人本姓田氏永安
中任都督鎮原州城受隴西王節度永熙中奉
迎魏武帝入關封鶉陰縣國子邑五百戶大統
三年轉帥都督進爵為公十四年授使持節都
督原州諸軍事又進爵封鴈門郡公食邑通前
二千七百戶保定元年授使持節都督岷州諸
軍事建德元年拜大司空三年遷少保三年授使
持節都督襄郢昌豐唐蔡六州諸軍事入仕四

十五年身經一百六戰後贈周柱國大將軍

宋

向寶鎮戎軍人為御前忠佐擢禮賓使涇原秦鳳鈐轄積勞自皇城使帶御器械歷真定鄜延副總管遷龍神衛四廂都指揮使嘉州團練使寶善騎射年十四與敵戰斬首二級及壯以勇聞有虎踞五原卑邪州東西百里斷人跡寶一矢殪之道過潼關巨盜郭邈山多載關中金帛子女寶射走之盡得其所掠嘗至太原梁適射弩再中的授寶矢射之四發三中適曰今之飛將也神宗稱其勇以此許仁貴及死厚恤其家

曲端鎮戎軍人父渙任左班殿直戰死端警敏知書善屬文自幼長於兵略歷秦鳳路隊將涇原路通安砦兵馬監押權涇原路第三將復知鎮戎軍兼經略司統建炎元年十二月金婁宿攻陝西二年正月入長安鳳翔關隴大震二月義兵起金人自鞏東還端時治兵涇原招流民潰卒所過人供糧結道不捨遺金遊騎入境端遣副將吳玠據清溪嶺與戰大破之初叛將史斌圖興元不克引兵還關中義兵統領張宗諤誘斌入長安而散其眾欲徐圖之端遣吳玠襲斌擒之端自襲宗諤殺之三年九月遷康州防

禦使涇原路經略安撫使自謝亮歸朝廷聞端
欲斬王庶疑有叛意召端端疑不行議者喧言
端反會張浚宣撫陝西入辭以百口明端不反
浚以端在陝西屢與敵角欲仗其威聲承制築
壇拜端為威武大將軍知渭州端登壇受禮軍
士歡聲如雷浚欲用端然未測端意遣張彬詣
渭州察之彬見端問曰公嘗患諸路兵不合財
不足今兵已合財已足婁宿以孤軍深入吾境
我合諸路攻之不難萬一粘罕併兵而來何以
待之端曰不然兵法先較彼已今敬可勝止婁
宿孤軍一事然將士精銳不減前日我不可勝

亦止合五路兵一事然將士無以異於前况
金人因糧於我我嘗為主今按兵據險以擾其
耕獲彼必取糧河東則我為主彼為客不一二
年必自困斃可一舉而滅也萬一輕舉後憂古
大彬以端言復命浚不主端說四年春金人攻
環慶端遣吳玠等拒於彭原店端自將屯宜祿
玠先勝旣而金軍復振玠小却端退屯涇州金
乘勝焚邠州而去玠怨端不為援而端謂玠前
軍已敗不得據險以防衝突乃劾玠違節制端
為帥訓練有方極力報國及卒陝西士大夫莫
不恤之軍士為之涕泣

全

張中孚字信甫其先自安定徙居張義堡父達仕宋至太師封慶國公中孚以父任補承節郎宗翰圍太原其父戰歿中孚泣涕請述父尸乃獨率部曲十餘人大軍中竟得其尸以還累官知鎮戎州兼安撫使屢從吳玠張浚以兵拒大軍浚走巴蜀中孚權帥事天會九年睿宗以左副元帥次涇州中孚率其將吏來降睿宗以為鎮兆軍節度使知渭州兼涇原路經略安撫使齊國建以什一法括民田籍丁壯為鄉軍中孚以為涇原地瘠無良田且保甲之法行之已習

本遽紛更人必逃徙祇見其害未見其利也竟執不行時齊政甚急莫敢違人為中孚懼而中孚不之顧未幾齊國廢一路獨免括克之患天眷初為陝西諸路節制使知京兆府朝廷賜地江南中孚遂入宋宗弼再定河南陝西移宋人使歸中孚至汴就除行臺兵部尚書遷除參知行臺尚書省事明年拜參知政事貞元元年遷尚書左丞封南陽郡王三年以疾告老乃為濟南尹加開府儀同三司封宿王移南京留守又進封崇王卒年五十九加贈鄧王中孚天性孝友剛毅與弟中彥君未嘗有間言喜讀書頗能

書翰其御士卒嚴而有恩西人尤畏愛之葬之日老稚扶柩流涕蓋數萬人至為罷市其得西人之望如此

張中彥字才甫中子弟少以父任仕宋為涇原副將知得順軍事睿宗經略陝西後轉真定尹兼河北西路兵馬都總管未幾致仕西歸京兆起為臨兆尹兼熙秦路都總管鞏州劉海構亂既敗籍民之從亂者數千人中彥惟論為首者戮之西羌吹折密藏隴逋龐拜四族恃險不服使侍御史沙醇之就中彥論方略中彥曰此羌服叛不常若非中彥自行勢必不可即至積石

達南寺酋長四人來與之約降事遂定賞而遣之還奏上大悅遣張汝玉馳驛勞之賜以毳文金幣用効恩加儀同三司以疾卒于官年七十五百姓哀號輟市立像祀之

前代名宦

魏

竇熾為原州刺史柳挫豪右申理幽滯每親遊壠畝勸民耕桑在州十載甚有政績州城之北有泉水屢經遊踐嘗與僚吏宴於泉側因酌水自飲曰吾在此州惟當飲水而已及去職之後吏民感其遺惠每至此泉者無不懷之

李賢字賢和漢騎都尉陵之後也為原州都督
大統二年州人豆盧狼害都督大野樹兒等據
州城反賢率敢死士戰敗之狼斬關道走賢追
斬之八年以功授原州刺史俄而茹茹圍逼州
城賢追擊之捕獲不可勝計人得安堵加授使
持節車騎大將軍儀同三司

李遠賢之弟為征東大將軍從征寶秦復弘農
並有殊勲授都督原州刺史沙苑之役遠功居
多除車騎大將軍儀同三司進爵平陽郡公邑
千戶

隋

元褒為原州總管有商人為賊劫其人疑同宿
者而執之褒察其色寃而辭正遂捨之商人詣
闕訟褒受金縱賊隋文帝遣窮之使者簿責褒
何故利金而捨盜褒引咎無異詞使者與褒俱
詣京師遂坐免官其盜尋發他所上謂曰何至
自誣褒曰臣受委一州不能息盜臣罪一也百
姓為人所謗不付法司即放免臣罪二也不存
形迹至今為物所疑臣罪三也臣有三罪何所
逃責臣又不言受賂使者復將有所窮究然則
縲紲橫及良善重臣之罪是以自誣上嘆異之
稱為長者

趙軌開皇初為齊州別駕有能名考績連最詔至京與牛弘撰定律令格式時衛王爽為原州總管召為司馬在道夜行其左右馬逸入田中暴人禾軌駐馬待明該禾主酌直而去原州人吏聞之莫不改操

獨孤楷仁壽初為原州總管時蜀王秀鎮益州文帝徵之猶豫未發朝廷恐王秀變拜楷益州總管馳傳代之秀果有悔色因勒兵為備秀至興樂去益州四十餘里將反龔楷密令左右覘所為知楷不可犯而止

李穰字顯慶隴西城紀人漢騎都尉陵之後也

建德初拜太保歲餘出為原州總管數年進位上柱國

唐

元載字公輔鳳翔岐山人大曆八年吐蕃寇邠寧議者謂三輔以西無襟帶之固而涇州散地不足守載嘗在西州具知河西隴右要領乃言於帝曰國家西境極於潘原吐蕃防戍乃在摧沙堡而原州界其間草薦水甘舊壘存焉比吐蕃毀夷垣墉棄而不居其右則監牧故地巨塹長濠重復深固原州雖早霜不可藝而平涼在其東獨耕一縣可以足食請徙京軍戍原州乘

間築作二旬可訖貯粟一歲戎人夏牧青海上
羽書北至則我功集矣徙子儀大軍在涇以為
根本分兵守石門木峽隴山之關北抵於河皆
連山峻險寇不可越稍置鳴沙縣豐安軍為之
羽翼北帶靈武五城為之形勢然後舉隴右之
地以至安西是謂斷西戎之脛朝廷可高枕矣
因圖上地形使吏間入原州度水泉計徒庸車
乘畚插之器悉具而田神功沮短其議乃曰興
師料敵老將所難陛下信一書生言舉國從之
誤矣帝由是疑不決

楊炎素德元載思有以報之大曆十四年於是

復議城原州節度使段秀實謂安邊却敵宜以
緩計方作農是不可遽興功炎怒遣秀實為司
農卿以邠寧李懷光督作遣朱泚崔寧統兵各
萬人翼之詔書下涇軍恚曰吾軍為國西奔十
餘年始自邠土農桑地著之安徙此榛莽中乎
彼足踐既立城壘則又投之塞外且安置此乎
又懷光持法嚴舉軍畏之裨將劉文喜因人之
怨乃上疏求秀實朱泚為使詔以泚代懷光文
喜不奉詔閉城拒守質其子吐蕃以求援時方
暘旱人情騷擾郡臣皆請赦文喜帝不聽詔減
服御給軍且趣帥涇州士當受春服者皆卽賜

命此懷光率軍攻之壘環其州別將劉海賓斬
文喜獻其首涇州平而原卒不能城

康季榮以宣宗大中三年鎮涇原收復吐蕃原
州及石門驛藏木峽制勝六盤石峽等六關

東晉

王殷大名人也少為軍卒以功累遷靈武馬軍
都指揮使晉天福中徙原州刺史殷事母以孝
聞欲與人遊必先白母母所不可者未嘗敢往
及為刺史政事有小失母責之殷即取杖投婢
僕自笞於母前母亡服喪晉高祖詔殷起復以
為憲州刺史殷乞終喪服闋始出

後周

王盟為積射將軍隨賀拔岳為先鋒擒萬侯醜
奴平秦隴常先登力戰拜征西將軍平秦郡守
太祖討侯莫陳悅以盟為留後大都督鎮高平
及悅平除原州刺史後進爵至長樂郡公

宋

陳興澶州衛南人開寶中知鎮戎軍上言鎮戎
軍南去渭州瓦亭砦七十餘里中有二堡請留
兵三百人戍之俄與曹瑋秦翰領兵抵鎮戎軍
西北武延鹹伯州掩擊蕃寇章埋族帳斬二百
餘級生擒三百餘人奪鎧甲牛馬駝羊三百萬

計詔書嘉獎賜金帶錦袍器幣

許均開封人開寶六年知鎮戎軍嘗出遊至隴山水硤口真宗以其無故離城慮有狂寇奔突詔書戒敕俄以其不明吏治用曹瑋代之

曹瑋武惠王斌子太宗時徙知鎮戎軍李繼遷嘗用其國人瑋知其下多怨卽移書諸部諭以朝廷恩信撫養無所間以動諸羌由是康奴等請內附繼遷西蕃遠瑋邀擊於石門川俘獲其衆以鎮戎軍據平地便于騎戰非中國之利請自隴山以東循古長城塹以為限又以弓箭皆土人習障塞踐隧旣光語耐寒苦官未嘗與兵

械資糧而每戰輒使先拒賊恐無以責死力遂給以境內間田春秋耕斂州為出兵護作而獨其祖繼遷死其子德明請命于朝瑋言繼遷擅河南地二十年兵不解甲使中國有西顧之憂今國危子弱不卽捕滅後更強盛不可制矣願假臣精兵出其不意禽德明送闕下復河西為郡縣此其時也帝方以恩致德明不報旣而西廷家奴俄熱魏數大族請拔帳自歸諸將猶豫不敢應瑋曰德明野心不急折其翮後必颺去卽日將其士簿吳都山受降者內徙德明不敢拒遷西上閣門使瑋嘗上涇原環慶兩道圖至

國原志 卷之六
是帝以示左右曰華夷山川城郭險固出入戰
守之要舉在是矣因敕別繪二圖以一留樞密
院一付本道俾諸將按圖計事復為涇原路都
鈐轄知渭州與秦翰破章埋族于武延川分兵
滅撥臧於平涼於是隴山諸族皆來獻地瑋築
堡山外為隴竿城募土兵守之曰異時秦渭有
警此必爭之地也復知秦州兼涇原儀渭鎮戎
緣邊安撫使時喃斯羅強盛立遵佐之立遵乃
上書求號贊普瑋言贊普可汗號也立遵一言
得之何以處喃斯羅邪且復有求漸不可制乃
以立遵為保順軍節度使恩如斯譯督西羌將

舉事必先定約束號為立文法喃斯羅使其舅
賞樣丹與斯敦立文法於離王族謀內寇瑋陰
結斯敦解寶帶與之斯感激求自效間謂瑋曰
吾父何所使欲吾首猶可斷以獻瑋曰我知賞
樣丹時至汝帳下汝能為我取賞樣丹首乎斯
敦愕然應之後十餘日果斷其首來斯敦因獻
南市地南市地者秦渭之阨也瑋城之表斯敦
為順州刺史初張信知秦州置四門砦侵奪羌
地羌人多叛去畏得罪不敢出瑋招出之令人
馬贖罪還故地至者數千人每送馬六十四匹給
綵一端喃斯羅帥眾數萬大入寇瑋迎擊三都

谷追奔三十里斬首千餘級獲馬牛雜畜器仗
三萬餘遷客省使康州防禦使自是唃廝囉勢
威退保磧中不出秦人請刻石紀功優詔褒之
劉謙字漢宗開封府祥符縣人為涇原路總管
徙知涇州未行會賊寇鎮戎軍謙引兵深入賊
境破其聚落而還以功擢龍神衛四廂都指揮使
李繼隆至道初白守恭等送糧靈州為賊所邀
太宗急命赴之繼隆請由古原州蔚茹河路便
眾議不一繼隆固執論其事太宗許焉遂率兩
以進壁古原州令知京使胡守澄城之是為鎮
戎軍真宗卽位改為鎮安軍節度檢校太傅踰
月召還加同中書門下平章事解兵柄歸本鎮
李繼和繼隆弟上言鎮戎軍為涇原儀渭北面捍
敵又為環慶原渭儀秦熟戶所依正當回鶻西
涼六谷吐蕃馬臧梁家諸族之路自置軍已來
充張邊備方於至道中所葺今已數倍誠能常
步騎五千守之涇原渭州苟有緩急會于此
軍併力戰守則賊必不敢過此軍而緣邊民戶不
廢耕織熟戶老幼有所歸宿此軍苟廢則過此
新城止皆廢壘有數路來寇若自隴山下南去
則由三百堡入儀州制勝關自瓦亭路南去則
由彈箏峽入渭州安國鎮自青石嶺東南去則

由小盧大盧潘谷入潘原縣若至潘原而西則入渭州東則入涇州若自東石嶺東公主泉南去則由東山若故彭陽城西并入原州其餘細路不可盡數

劉綜咸平四年為陝西轉運使上言今於古原州建鎮戎軍宜置屯田今本軍一歲給芻糧四十餘萬石束約費茶鹽五十餘萬償更令遠民輸送其費益多請於軍城四面立屯田務開田五百頃置下軍二千人牛八百頭耕種之又於軍城前後及北至木峽口各置堡砦分居其人無寇則耕寇來則戰就命知軍為屯田制置使

自擇使臣充四砦監押每砦五百人充屯戍從之王仲寶字器之密州高密人天聖初知鎮戎軍改供備庫副使破康奴等族獲首領百五十羊馬七千詔獎其功

王珪開封人也少豪勇善騎射能用鐵杵鐵鞭累遷殿前第一班押班擢禮賓副使涇州駐泊都監康定初元昊寇鎮戎軍珪將三千騎為策先鋒自瓦亭至獅子堡敵圍之數重珪奮擊披靡獲首級為多叩鎮戎城請益兵不許城中惟縑糗糧予之師旣飽語其下曰兵法以寡擊眾必在募我兵少乘其暮擊之可得志也復馳入

有驍將持白幟植槍以詈曰誰敢與吾敵者槍直珪胸而傷右臂珪左手以杵碎其腦繼又一將復以槍進珪挾其槍以鞭擊殺之一軍大驚遂引去珪亦以馬中箭而還仁宗特遣使撫諭之然以其下死傷亦多止賜名馬二匹黃金三十兩暴創絹百匹下詔暴其功塞下以勵諸將韓琦仁宗時趙元昊反琦適自蜀歸論西師形勢甚悉既命為陝西安撫使召遣使出兵琦亦欲先發以制賊而合府固爭元昊遂寇鎮戎琦畫攻守二策馳入奏仁宗欲用攻策執政者難之琦言元昊雖傾國入寇衆不過四五萬吾逐

路重兵自為守勢分力弱遇敵輒不支若併出一道鼓行而前乘賊驕惰破之必矣乃詔涇原鄜延同出征既還營元昊來求盟琦曰無約而請和者謀也命諸將戒嚴賊果犯正川

范祥通判鎮戎軍元昊圍城急祥率將士拒退之請築劉璠堡定川砦從之

曹英知鎮戎軍慶曆二年元昊入寇葛懷敏督諸路與英等會兵禦之乃命諸將分四路趣定川砦行次趙福堡遇敵戰不遂入保定川砦敵毀板橋斷其歸路別為二十四道以過軍環圍之又絕定川水泉上流以飢渴其衆懷敏為中

軍屯塞門東偏英等陣東北敵先以銳兵衝中軍不動回擊英軍會黑風起東北部伍相失陣遂擾士卒攀城堞爭入英面被流矢仆壕中懷敏部兵見之亦奔駭懷敏為衆蹂躪幾死與致瓮城久之乃蘇復選士據門橋手刃以拒入城者夜四鼓懷敏召英等計議莫知所出遂謀結陣走鎮戎軍士遂散懷敏驅馬東南馳二百里至長城壕路已斷敵周圍之遂與諸將皆遇害於是敵長驅抵渭州幅員六七百里焚蕩廬舍屠掠民畜而去奏至帝嗟悼久之贈懷敏鎮戎軍節度使兼太尉英與同時戰沒者皆贈官

有差

鄭戩字天休蘇州吳縣人戩行邊至鎮戎軍趣蓮花堡天寒與諸將置酒元昊擁兵近塞會暮應是有敵騎至者戩曰此必三川將按邊回非敵騎也已而果然

王堯臣字伯庸應天府虞城人舉進士第一為陝西體量安撫使上言陝西兵二十萬分屯四路然可使戰者止十萬賊衆入寇常數倍官軍彼以十戰一我以一戰十故三至而三勝由衆寡不侔也涇原近賊巢穴最當要害宜先備之今防秋甚邇請益團士兵以三萬屯渭州為鎮

戎山外之援萬人屯涇州為原渭聲勢二萬屯環慶萬人屯秦州以制其衝突且賊之犯邊不患不能入患不能出也並塞地形雖險易不同而兵行須由大川大川率有砦柵為控扼賊來利在虜掠人自為戰故所向無前若延川之金明塞門砦鎮戎之劉播定川堡渭州山外之羊牧隆城靜邊砦皆不能扼其來故賊不患不能入也既入漢地分行鈔略驅虜人畜劫掠財貨士馬疲困奔趨歸路無復闔志若以精兵扼險強弩注射旁設奇伏斷其首尾且追且擊不敗何待故賊之患在不能出也賊屢乘戰勝重掠

而歸諸將不能追擊者由兵寡而勢分也若尚循故轍必無可勝之理又論延川鎮戎軍渭州山外三敗之由皆為賊先據勝地誘致我師將師不能據險擊歸而多倍道趨利兵方疲頓乃與生羌合戰賊始從鐵騎衝我軍繼以步卒挽強注射鋒不可當遂致掩覆此主師不思應變以懲前失之咎也願敕邊吏常遠斥堠遇賊至度遠近立營砦然後量敵奮擊毋得輕出詔以其言戒邊吏時韓琦坐好水川兵敗徙秦州范仲淹亦以擅復元昊書降耀州堯臣言二人者皆忠義智勇不當置之散地又薦种世衡狄青

國府志 卷五十五
有將才明年賊果自鎮戎軍原州入寇敗葛懷敏乘勝掠平涼潘原關中震恐自邠涇以東皆閉壘自守仲淹自將慶州兵捍賊賊引去仁宗思其言乃復以琦仲淹為招討使置府涇州益屯兵三萬人而使堯臣再撫涇原

劉昌祚知鎮戎軍為涇原副總管有保障功後又知涇州復牧馬地耗馬復初

范仲淹以西賊寇鎮戎軍官軍不利公牒知原州景泰等令六頭項下軍馬會合相度棟選精兵三二千人夜擊蕃岩探候山外賊馬回時即多出奇兵夜間或侵曉伏截衝擊收救人民

戒約不得脫剝被虜人戶人物公又恐諸將貪功一面急去追襲被西賊設伏兵更落姦手文牒景泰等火急多差人搜山探候如探得西賊先有伏兵即便就高駐劄別選敢死之士多作頭項先取掩擊只以收救人民不得貪小功利再有跡虞以負朝廷之意公又到邠州略示兵勢又出榜求興軍諸州以安關中人心張綸知鎮戎軍為人仁恕有才略所至興利除害

劉蕙濟開封府祥符縣人知鎮戎軍禦下嚴急轉運使言士心多怨請徙內地改涇原路鈐轄

復知寧州又知原州

張守約字希參濮州人以蔭主原州截原若招羌酋水令適等十七族萬一千帳後知鎮戎軍折可適知鎮戎軍有武略羌夏人十萬入寇可適先得其守烽卒姓名詐為首領行視呼出盡斬之烽不傳因卷甲疾趨大破之于尾丁磴田次檉楊溝正午駐營分騎據西山日彼若攝吾後腹背受敵必敗果舉軍來可適所部纔八千轉戰至高嶺西從間道趣供德設伏邀其歸路敵至伏發衝之其國毋踰山而遁焚棄輜重雖獲帳首飭之屬亦不返衆相繼赴尾澗死者

如積論前後功至皇城使成州團練使知岷蘭州鎮戎軍涓帥章榘合熙秦慶三道兵築好水川命總管王文振統之而可敵將軍為副熙州兵千人失道盡死又振罪歸于可適榘即下之吏宰相章惇欲按軍法哲宗不許猶削十三官而罷榘請留以責効乃以擢第十二將鬼名阿埋昧勒都逋皆夏人桀黠用事者詔可適密圖之會二酋以畜牧為名會境上可適知之遣兵夜往襲并俘其族屬三千人遂取天都山帝為御文德殿受賀以其地為西安州遷可適東上閣門使

章粲紹興四年知渭州城平夏粲以夏人猖獗
上言城葫蘆河川據形勝以備夏朝廷許之遂
合熙河秦鳳環慶鄜延四路之師陽繕理他砦
數十所以示怯而陰具板築守戰之備出葫蘆
河川築二砦於石門峽江口好水河之陰夏人
聞之帥衆來乘粲迎擊敗之二旬又二日城成
賜名曰平夏城靈平砦章惇因請絕夏人歲賜
命沿邊相繼築城於要害以進拓境土凡五十
餘所元符二年夏人圍平夏章粲禦之獲其勇
將鬼名阿埋西壽監軍昧勒都逋斬獲甚衆夏
人震駭捷至帝御紫宸殿受賀粲在涇原日久

嘗言夏人嗜利畏威不有懲艾邊人不得休息
宜稍取其疆土如古削地之制以固吾圉然後
諸路出兵擇要營不一再舉勢將自蹙矣章惇
與粲同嘗言多見采由是創州一城砦九屢敗
夏人而諸路多建城砦以逼夏及平夏之捷夏
人不復振

金

石蓋女魯歡本名十六興定三年以河南路統
軍使為元帥右都監行平涼元帥事言鎮戎赤
溝川東西四十里地無險阻夏人往來之衝比
屢侵突金兵常不得利明年春當城鎮戎彼必

出兵來撓乞於二三月間徵傍郡兵聲言防護
且令鄜鞏各屯其境上示進伐之勢以掣其肘
臣領平涼之衆由鎮戎而入攻其心彼自救之
不暇安能及我如此則鎮戎可城而彼亦不敢
來犯又言所在官軍多河北山西失業之人其
家屬仰給縣官每患不足鎮戎土壤肥沃又且
平衍臣禪將所統幾八千人每以遷徙不常為
病若授以荒田使耕且戰則可以經營一方縣
官省費而食亦足矣其餘邊郡亦宜一體措置
上嘉納焉

蕭貢字真卿京兆咸陽人大定二十二年進士

調鎮戎州書令史右三部檢法司正遷監察御
史改右司都事遷員外郎改左司諫轉左司郎
中遷國子祭酒

詩

送項都憲平虜凱還集句 副使宋有文撰

成化戊子夏平涼逆虜肅聚據險猾夏大肆荼
毒

上命都臺大人項公總督三軍討之直擣巢穴
出奇策冒矢石凡百餘戰而酋虜就擒巢穴尋
平時某執事帳下目擊成功故喜而集句九章
以頌之首述

國家創業繼統之隆而黠虜昏愚跳梁繼美其
付託出將而車馬兵威無敵未言戡靖患難執
訊獻俘而寵膺入相焉然不足以揄揚公烈萬
一之盛抑亦庸備凱還之歌云耳

嗟嗟烈祖

受天之祜

綱紀四方

奄有下土

明明天子

繩其祖武

柔遠能邇

民之父母

儼然匪茹

敢距大邦

內燬中國

陟彼高岡

多將熇熇

如蝸如蟻

曾是疆禦

亦孔之將

六月棲棲

我征徂西

是類是禡

建旄設纛

薄伐獫狁

方何為期

既破我斧

民之方殿

王赫斯怒

乃眷西顧

王命卿士

文武吉甫

陳師鞠旅

深入其阻

左右陳行

仍執醜虜

檀車煌煌

駟介旁旁

塗以艘輶

折旄央央

愷弟君子

時維鷹揚

有慶秉鉞

儉狃于襄

我師我旅

如霆如雷

我徒我御

維熊維羆

式遏寇讐

無縱詭隨

是伐是肆

儉狃于夷

赫赫業業

無競維烈

桓桓于征

一月三捷

孔淑不逆

無俾作慝

寵綏四方

惠此中國

勿士行枚

載靈為矢

振旅闐闐

垂轡滂滂

執訊獲醜

言旋言歸

無大無小

云胡不喜

入覲于王

佩玉鏘鏘

以奏膚公

萬民所望

天子是若

載錫之光

實維阿衡

天子之邦

西行至固原

秦紘

一第登庸五十年幾番黜逐幾超遷達官固守
寒儒節文吏常無大將權倦鳥歸來方斂翼回
鸞召起復行邊從今再試平胡策百二山河保

萬全

題固原鼓樓

楊一清

西閣風高鼓角雄南來形勢倚崆峒青園睥睨
諸山遶綠引潺湲一水通擊壤有歌農事足折
衝多暇虜塵空登樓不盡籌邊意渺渺龍沙一
望中

又

前人

設險真成虎豹關層樓百尺枕高寒重城列戍
通三鎮萬堞緣雲俯六盤弦誦早聞周禮樂羌
胡今著漢衣冠分符授鉞知多少誰有勳名後
代看

借寇中丞登固原鼓樓次韻 王夔

隴北新州地勢雄城南百里峙崆峒秦關農父
供輸困河朔單于烽火通春盡荒山園四野天
高寒日墮晴空徘徊不盡登臨意世態相忘
醉中

嘉靖己丑夏五月兵過預望城 前人

原州直北荒涼地靈武臺西預望城路入葫蘆
細腰峽苑開草莽苦泉營轉輸人困頓增戍寇
掠胡輕散漫兵我獨徵師三萬騎揚威塞上虜
塵清

嘉靖乙酉六月登鎮西樓次家慶翁韻

唐龍提學副使

縹緲危樓百尺雄雕甍丹柱映崆峒月明青海
烽烟息雲隔天山箭枯通清夜角聲流遠塞高
秋旗影拂長空輕裘緩帶時登眺胡虜長驅一
嘯中

又 前人

北地重門金鑰固胡天六月纊衣寒蒼蒼木峽
風雷變隱隱蕭關虎豹盤方叔壯猷三授鉞子
儀聞命再彈冠神丘銅柱叅雲立紅日青霄倚
劍看

辛卯冬伏鉞駐州重登樓次漳南中丞韻

前人

天邊斗閃牙旗建塞外雷鉤羽檄行盛世禦戎
惟上策中原設險有長城雲連芳草鳴沙靜日
射奔鯨瀚海清直上層樓迎勝氣謾舒一嘯散
胡兵

預望城次晉溪翁韻

前人

踈茅若結千人戍苦水沙環三里城雪暗犬羊
歸舊穴雲明驃騎出新營高深溝壘重門險呼
吸風霆六月兵青草塞前農耜舉黃榆道上凱
音清

過開城

孟洋參政

亂山歎壑入開城禾黍油煙霧生塞上草深
充國障水邊花暗亞夫營青林過雨流鶯濕綠
野含風戰馬鳴自有奇謀樽俎地書生容易莫
論兵

巡邊寫懷

李素巡茶御史

路入關城苑苑臨風獨愴神四年三度早十室九
家貧凍霧渾迷日寒蕪尚待春柝聲烽火塞偏
切宦遊人

彭陽城曉行

桑溥兵備副使

曙色彭陽道天空度鴈聲旗翻青障外人傍白
雲行露重征袍濕山高野火明十年常作客深

愧兢浮名

登須彌山閣

郭鳳翔

兵備副使

春暮登臨興尋幽到上方雲梯出樹抄石閣倚
空蒼烽火連沙漠河流望渺茫馮欄思頗牧百
代將名揚

記

重修朝那秋龍神廟記

學正李誠撰

開成州東北距三十五里有秋曰朝那有山環
焉秋東岡阜上直祠設像神曰蓋國大王考之
傳記春秋時秦人詛楚之文投是秋也漢唐載
在祀典金宋邊臣嘗祀於祠碑誌仍存金表在

塵蕩起祠無人居上雨傍風久赤摧墮瓦礫榛
蕪弗辨聖元興滅繼絕命官剗荒芟穢建廟致
祭頗福其土焉凡他州旱誠敬祈禱雨暘之應
曾未旋踵大德丙午陵谷變遷殿宇湮滅祈眚
日慢州之群庶弗獲陰休延祐甲寅神降焉攝
土人佛玉保通傳復構堂屋繪神塑像俱盡其
美元統乙亥月屆蕤賓連旬不雨禾且告病知
州朶兒只先一日齋戒躬率僚吏奉幣祝恭事
祠下未及州而澍雨越三日乃止均澆四境郡
人驩呼民遂有秋之望五日朶兒只復率僚吏
詣祠謝雨所以致禱祀之實交孚隱顯之際以

極其誠也歲丙子婦人劉氏捧白錫匣告子曰
夫藥佛玉保同度共修蓋國大王廟貌幾有年
矣勤勞之篤靡一朝而成夫佛玉保嘗共妾拜
祀湫涯俄然水湧浪開浮泛是匣飄游赴岸夫
拜受啓視匣內有髮二縷金銀首飾匣割崇寧
三年三川縣婦人張梨香為舅姑俱亡夫亦早
逝建新廟於茲指是投湫以祈後會明年夫病
臨終託妾曰予共汝立祠事神十餘載天不假
我以壽汝肯繼吾志守廟立碣以紀其事乎妾
應曰諾自承命以來夙夜未忘於懷今十年矣
妾幸稍健祠完神具獨碑未鐫恐一旦疾作有
不勝其悔矣何面見夫於地下石且礮矣請紀
其事以信其願雖瞑目無憾噫雲雷風雨神實
司之龍神變化莫測豈以一畝之官為可居焉
此窈窕之事不可測度者凡禱則恃吾誠而已
然人與物同氣而生異於物者仁義存於身也
有則三才立無則五典廢矣天壤中豈可不以
仁義而操存焉劉氏以女子之身持堅確之志
始終一念殊無別意此義者也與非義者必有
能辨者焉敬述所以立祠之意以告邦之人與
來為政者知事神之義在此而不在彼庶有以
致其禱祠之實云

重修顯靈義勇武安王廟記 應訪使梁遺攝

元統甲戌夏四月六盤山都提舉司案牘張庸
一旦款門告予曰庸古并民籍延祐庚申季冬
蒙中政院委充提領所副提領歲辛酉蒞任職
掌催納糧租歲辦夏稅千餘石例投提舉司庫
使閻文彬收掌驗數給付歲終考校官為准憑
歲壬戌

朝廷差官陳署丞馳驛募計本司上下計分楮
幣租稅問庸汝納稅數有租契否庸賚元給收
付為照丞曰殊無印符難為憑准遂問庫使文
彬從而隱匿丞曰 國朝有何負爾敢如是邪

令卒隸囹圄責監承限逋納庸曰此寃何地可
伸越明日庸禱於

顯靈義勇武安王廟內跪拜未語鎖自釋監卒
見怖遽告署丞丞大怒命執廳下曰汝罪當何
刑督責益急申諭監卒重鎖固衛言未訖俄聞
空中發矢之聲鎖墮於地丞曰予造天役敢不
卒究事若信茲而緩於法恐未宜復行監鎖次
日推問官吏咸列左右有聲自空鎖轟於地碎
猶沙礫聞者莫不震悚髮豎官吏更諫丞
曰此幽暗之事不可測度莫若及庫使亦同監
鎖自行規兌丞從之明日文彬共庸拜誓于

王至祠未矢忽二雀翔下高空集文彬首二爪
爬髮兩翼擊面鳴聲啾啾衆駭一辭何不受實
文彬神思昏潰如癡醉人耳良久方甦叫曰我
等不合欺心自召此報言畢雀即飛去既而從
其家求爰得日收曆一卷照與庸付同官吏以
是白丞丞乃釋庸嘆曰誠透金石格天地感鬼
神觀此可知泰定改元庸見王祠門夷垣拔不
足以安靈遂捐已財命匠度材增築其址締構
屋三楹中為通路以謹出入告成宜有文以識
其事今石礮矣願有請也遺嘗觀史傳王生能
佐其主毋二厥心攻敵無盪守城必完臨危蹈
難乘機應會捷出風響竭心力供臣子之職扶
漢基於煨燼之末以能迎天之休炳耀今古薨
卽為神或隱或見來不可測去不可度察物曲
直明證肝膽又能驚動禍福於天下也寔謂靈
也已由今望之其英風義氣凜凜然使人危懼
洋洋然如誠見焉是故有以感服人心嚮慕不
已而廟食於天下也僕固辭弗獲竊嘉張庸好
義之誠因并記之以詔後之來者

創建城隍廟碑記 平涼知府田暘撰

凡天下郡邑通得祀者惟城隍與社稷為然故
當祀之郡守皆躬自盥薦不敢慢邑人四時皆

得常祀非如社稷止於守土者春秋二祀也固
原州大金為鎮戎州城圍九里有安邊鎮夷二
門城隍建置莫詳厥初

大明景泰庚午憲副古并韓公等董築斯城摘
調洮岷臨鞏等衛官軍操守都指揮同知榮福
往來提督未幾奏調平涼右千戶所全伍官軍
立為所推靖虜衛署指揮僉事張正掌所事而
榮侯總其綱乃以城池既完非立城隍廟則郡
內之人何由知幽明同一理感應同一機哉榮
侯同張指揮使於是因其人力捐已俸以倡其
端募衆資以助其費僉謀協同郡公効力殿宇

廊廡煥然一新左司右司六曹分列東西後為
寢堂前揭廟榜聖母土地秩然而有序凡香案
爐瓶之具亦莫不極其精備始於景泰元年三
月三日以是年秋八月告成俾予記之予惟城
隍之神內自京師外至郡邑皆得崇祀昭然可
考今榮侯來總戎兵保奠是方乃於城完之後
不遑他務而汲汲於廟神之建可謂克知幽明
之理矣由是廟貌巍峩而神為依止水旱疾疫
以致其禱吉凶禍福以顯其應則將綿延千祀
廟食無窮矣不勒於石刻則後之來者孰知廟
之所由作乎故凡有有功於是廟者咸紀其姓氏

於碑陰并系以侑神之樂歌曰神之來兮以風以雨惚兮恍兮不知自何許高城池深兮實所主禍福淑慝兮血食茲土侯之政兮邁前古作新廟兮興百堵鑑錡其鍾兮坎坎其鼓薦時物兮潔樽俎神之格兮錫純嘏驅厲鬼兮豐社稷吾民以寧兮物皆卷舒皇風清夷兮徧寰宇

乾鹽池碑記

戶部尚書楊鼎撰

定戎砦一名乾鹽池里誌不載其詳無從考徵平舊壘中得前人所作過定戎砦詩鐫始知其名也其境東接西安州西入打刺赤南通會寧縣北達寧夏豈宋禦夏致此至金始隸平夏歟元廢不治我

國朝取其水草利澤止作司牧之所北狄剽掠經此出沒實緊關要地不可無兵守鎮以揚天威於沙漠也粵成化歲辛卯僉憲楊君勳籌畫此策潛消虜跡移兵屯此掘隍成壘事未卒成越九載己亥虜復寇由此砦翼歲庚子夏憲副王君繼備呈其狀巡撫都憲阮公勤善楊君所謀擬移兵鎮之乃曰必須相察以驗可否入冬公始歷覽邊鄙心舒目行視故城遺址違新城一里許廣平弘敞互澍諸泉信可仍其舊公

曰事實因循何必改作矧此基規模壯麗土疆
墳衍前指後畫公志先定詢謀僉同卒更其初
議及公歸謀諸鎮守太監毆公賢都督白公地
叅議若符良圖允協忻然大舉厥猷而贊齊業
執遂馳表陳其所以

皇上明見萬里必切於始納公嘉謨詔特允之
於是公自度量稱才受任分土責成士卒爭先
經之營之趨赴不怠若翼歲辛丑理兵政憲副
翟君廷蕙繼至綱領厥務戒之用休董之用威
百事為心功克以濟總厥工者指揮使劉端公
厥任者本所暨平輩諸郡指揮朱勇等增益故

五里有荷崇高四尋加厚三丈墜閣池深
象巍嚴獨勝邊方諸城依坵作闕南構一樓峭
然各省以快眺望名曰定邊出入二閩東鎮夷
西服虜三偏公所命字志在柔遠以揚聲教焉
至若城隍旗纛神祠察院倉場鼓樓街衢廩舍
咸左右其公衙井五其民居百堵俱興無一不
理丕作辛丑年二月位成於是年八月歷時二
百一十日書役二千八百工是舉也未愈半載
而百工告成衆謂事成之速上下無怨不可無
紀翟君遣使齎禮幣不憚千里而來謁予為記
夫伯鯨作城以居衆古制也書曰申畫郊圻慎

固封守易曰王公設險以守其國孟子曰天時不如地利地利不如人和其來有自矣但寰宇有遠近地形有夷險土性有剛柔便於板築者短於朽蠹利於耕鑿者病於樵牧况如底者多受敵臨險者難控禦界乎邊境者尤難於腹裏欲得衆心悅服杜絕後患興已廢之跡創未有之業顧識見目力用心何如斯固難矣詳此地四圍山環中原坦夷勢若天塹以限華夷也非惟墳壤可築可朽優於脩理亦且可耕可鑿可樵可牧裕於屯守故壘舊址易於損益土脉沃饒宜登稼穡池液受渠便飲甘鹵人被六氣之用家獲作鹹之利因民之所利而利之故民之遷也如歸市不待耕耘負粟以食之不待乘屋穴居以處之使無益上下刑驅有不齊矣得如此乎相此地者其目力識見過人遠矣古人云疆域障塞歲久則易湮世平則易玩况天下承平日久保成者為難事豈有築城池摘右所壯皇明鎮西夷者乎吁公之績孰不美丕耶向之宣化往來經此惟路次寅夜惶惶今而館受宵宿可保無虞矣且城堅池固使虜人來者衆估我芻糧郭郭阻其饕餮堅壁清野無從鼠竊矣來者寡仗吾利兵健駐截其喉項折馘執俘無

復遺類矣夫以陝右羅列三邊之廣連城衛所
之盛可移可修者奚一定戎而已哉苟率能效
慕而更新之則夷虜膽破寇消畏威誓服烽火
不警黎民得安堵邊境可謂清矣由是

九重少西顧之憂廟廊已運籌之計元元免轉
輸之勞關中可謂安矣公仍賦其屯糧物其方
士慮尚艱食定其租稅三年後乃作真恩義兼
盡矣吁公之心孰不云盡瘁耶將來士卒感慕
三千一心如古之逐獫狁遁匈奴戰無不勝矣
裨將奮發六軍併力如古之滅檜榼獲闕氏功
無不克矣在人養習何如誰議今不若古哉大
抵春秋書新延廐謂時得為也春秋書新作南
門謂制不可為也今公是舉也既稱情乎時制
又壯觀乎

國家非春秋之可議烏可泯而不傳諸後乎詳
書以著其更作之始俾來者有所考焉嗟乎守
在四夷公之大志牧用趙卒公之遠謀策公之
勲古人今人豈多讓哉太史秉筆必大書之曰
丕績贊之曰克勤於邦矣繼守斯城者可不勉
諸是為記

靖虜衛右所察院記

提學副使戴剛撰

陝西靖虜衛右千戶所暨察院次第訖工察院

國原志 卷之七
中有堂後有寢左右有室為間凡二十闢前門以通除正道以馳崇周垣以障謹高啓致嚴潔用待臣僚之秉

國憲者按察副使渾源孫君逢吉以練達之才董乃戎政大舉而細不遺以記見徵予按靖虜衛在靜寧安定諸郡縣之北部落有所謂乾鹽池者間於西安州打刺赤城廢自勝國曠為牧場河水時胡虜南入為寇乘虛伺隙率茲取道西安州打刺赤雖擁城戍相去餘八十里應援兩未易及先是按察僉事安岳楊君勉有憂之議近廢城增戍守工築已興不克終久之巡撫

得都察院右副都御史上黨阮公勤宅心忠謹修明庶政而其謀邊尤樂取羣策副使今山西按察使大梁王君繼首申楊君之議公卽行邊地理人情之肯綮心目間無所遁謂修復廢城衛折右千戶所來徙乃便謀諸鎮守太監延平歐公賢都督同知永平白公玘以為然疏聞允之副使洛陽翟君廷蕙承檄調度惟謹繼以孫君事克就緒屬右副都御史舒城鄭公時來巡撫器識宏敏知利必與勸相是役恐後或曰古者為政重民力節妄費故不時害義之興作春秋無善書窮邊小墜若察院乃在於得已

耶噫不然有所治則有官吏有兵馬則有耕牧
芻粟烽埃不一而足舉息惟其人之存亡故必
有待於中外秉憲之臣或撫或巡申政教公勸
懲官吏欲其守且為也兵馬欲其精且強也耕
牧芻粟烽埃以藩以積以時也夫然守之則固
征之則捷矧近戎可以併力而衛之全師足倚
為虜且寒心屏跡之不暇而暇寇衛與郡縣於
是乎安矣厥惟撫巡憲臣丕揚

朝廷恩威之力居上臨下以隆體貌以聳視聽
以一心志察院豈可少哉而不容以不作也於
戲人之一身心腹皮膚相以為安而手足捍衛
所不可無郡縣猶心腹也衛猶皮膚也所猶手
足也運用手足豐潤皮膚康裕心腹要皆元氣
克周為之主本憲臣其元氣歟故曰賢才國家
元氣苟末視邊壤曠歲累月無足跡焉足跡
雖及而又憲度不張安壤無補元氣削矣所謂
郡縣衛所如心腹如皮膚如手足者奚賴哉察
院之作顧為虛器律以春秋之法不害義否凡
我秉憲君子尚謹其圖毋貽興作者之憂所治
顛末太子少保戶部尚書關中楊先生故有述
敢略

打刺赤碑記

巡檢柳世雄立石

崇寧元年壬午歲承

朝旨築打繩川熙河帥姚雄駐兵會州應錢糧
運使吳安憲統制官熙河郭祖德劉戒涇原喬
松秦鳳劉德西築水泉正川二堡通古會三月
初皆畢功行打繩川賜名懷戎堡隸會州熙河
第八將後三年乙酉歲正月割隸涇原改第十
五將將官張普統領人馬東築通懷堡接涇原
定戎關護道壕當年八月却隸熙河復第八將
懷戎東南曰屈吳山大神山小神山皆林木森
茂峯巒聳秀山間泉流數派以法泉禪寺為額
給田五十頃歲賜撥放柴衣西南白草原通會

州北有寶積山產石炭甘鐵東北去西壽監軍
一百五十里西北去馬練城八十里堡之西南
百餘步有泉眼湧出泓澄甘冽止而為湖不徒
有賞翫之景民田灌溉實賴其利大觀三年已
丑春廢寨主將兼領之安泰自是年中冬到官
布耳目備戰守庚寅春創贍軍園補烽臺完城
堞更寨宇為懷戎堂以延使節置衙教場建利
威堂閱武習射秋閏八月與夏人分畫界辛卯
春展將聽便於管檣孟夏創寶積堂因山名之
仲夏就堂之北葺書室曰鎮靜齋蓋新制擇將
深沉鎮靜果敢有勇者為將副就而名焉創堡

國原志 卷之七十四
將已十年殊無銘記慮其歲久莫知始末安泰
昔任運司日嘗董築事今復官此直叙其詳使
後來者有所考

重建靖虜衛打刺赤城記

僉事楊勉撰

打刺赤古城按舊誌不載興廢之由或者以為
宋禦夏人之患所築歟是城東距西安州八十
里西去靖虜衛八十里北臨虜寇衝突之地南
控居民耕牧之場先是城之北有堡曰迭烈遜
密邇雪山黃河

國朝於是堡分布屯軍置巡檢司衙門每歲增
以戍兵蓋防河凍虜出之患也自正統成化以
來酋虜數經是堡入寇中原軍民累遭荼毒本
堡警懼甚焉成化八年前鎮守靖虜叅將周海
暨衛指揮使路昭等以其事計於予曰迭烈遜
地僻城孤入寇難守不若打刺赤古城外則可
禦賊內則可屯兵戍且又為地理四達之處
若以巡司并屯軍俱移於此不為軍民不便乎
予遂以其事白于巡撫陝西都臺大夫馬公文
升鎮守陝西太監劉公詳總戎白公玉暨藩臬
諸大臣曰然乃疏其實以

聞詔允其請命下馬公以厥事屬諸勉遂往相
厥地計其徒庸而以是衛指揮同知朱勇董厥

國原志 卷之五
正成化九年春叅將趙公永和來鎮是地遂得
戮力一心襄成厥事城則因舊而築廢者補之
缺者增之城完趙公遂名其門東曰定遠西曰
得勝與凡公第倉廩市井營舍次第借作自經
始至浚事閱九月而就其役以工計者二千五
百其城以步計者七百八十有奇其屋以間計
者百五十有餘仍籍其附城空閑地畝分為七
田於鎬鑰有禁鐘鼓有時士馬精強部伍整肅
七田耕牧可保無虞胡虜聞風莫敢延頸西望
而地方以寧矣趙公謂予兵備是地宜有言以
述建置之由焉予嘗稽諸載籍自古禦戎之道
固以攻戰為先尤以守備為本况醜虜逞彼犬
羊之性憑陵我民庶蹂躪我邊疆其勢熾矣若
非固城宿兵以守之備彼賊衝突無時遽將何
以遏之乎故昔南仲城朔方而猷統之難自除
范仲淹守清澗而契丹之暴自沮者良由是也
然則是一建巡鎮諸公禦侮安民之功殆非小
小繼自今來守是地者尤能行相體時葺廢甯
碑無歲久易湮之失則不負巡鎮諸公愛利之
惠而趙公之惠亦久而不泯矣是為記

固原增修廟學記

太子太保王恕撰

皇明奄有天下統理萬邦內自京都外及郡邑

與軍衛運司俱設學校師儒教育英才而賓興之以為治化之藥石于以壽國福民於無窮也治效之盛可以媲美三代盛時而無愧焉固原在平涼府西北路當通衢原有城隍設千戶所守禦其地屬開城縣矣

國朝成化五年改為固原衛開城縣舊在固原南四十里成化三年虜寇肆侮侵犯縣治為之破壞乃徙於固原城內廟學草創弗稱弘治十四年

上命戶部尚書兼都察院左副都御史單縣秦公總制三邊軍務駐節固原公乃屈力殫慮大

展新蘊凡百安內攘外之策無不修舉十五年築固原外城奏陞開城縣為固原州公諭令軍民願求外城之內地為居室釐署聽輸銀入官授之以地而有差等人以為其地乃商販之所走集又通鹽利眾皆樂從所得價銀甚富公以為廟學草創陋陋弗稱不可視為傳舍而不理乃謀恢宏開拓畫圖增修簡命生員張正學總理其事以前所入之銀易城中之地為廟學之基東至指揮王爵宅西至守備衙門南至官街北至抵街廣二十五丈袤五十七丈其地平正塋壇堪為學宮營葺材僦工造大成殿八楹崇

五尋戟門櫺星門各三間崇二尋兩廡各二十
五間崇二尋殿後起明倫堂五間東西齋各六
間堂后作師舍四所齋後作生徒舍四十間戟
門右作神庫三間生徒舍左作饌堂五間生徒
舍右作廩庾三間其規制與夫工費悉總制公
之處置工已抵於九仞而奉

命回朝濱行乃以未完之工托兵備憲副石州
高公崇熙公諾之以為已任晨夕用意督令張
正學逐一而完之正殿則覆以琉璃棟梁椽題
則黝聖丹漆間以金飭戶牖階陛則有欵制廉
隅可啓可閉可陞可降而不違則焉像設嚴然
足以聳人之起敬堂陛森然足以使士之發憤
是役也始事于弘治十六年七月落成于十八
年九月憲副高公狀其事具禮幣遣生員彭玘
段錦謁老夫以記見屬老秦素非文字家今且老
耄昏塞實不勝其事再三辭謝而三請益勤乃
為之言曰吾夫子之道乃二帝三王繼天立極
明人倫治天下之大道吾夫子刪述六經大明
斯道垂憲萬世自是以來有國家者建學立師
儲養英才以待任用然而師之所以為教弟子
之所以為學無非斯道也身之所以脩家之所
以齊國之所以治天下之所以平亦豈外于斯

道乎是故學必有廟釋奠天子崇重祀事以報本也今總制公於整飭邊備之際復以餘力增脩學宮至於如是之壯麗兵備公受總制之付托果能終其事而完且美矣皆可書也故次第之以為記云

固原州增脩廟學記後 張泰撰

往聞秦公總制陝西三邊軍務卓然有聲績心恒慕之近予承乏而來歷延綏寧夏諸處尋公故績歷歷可仰因以固原州立實公建議且嘗大新廟學規拓城隍區處塩法其績尤著必有記載可考既至其地環顧周視曾無寸石片瓦

可按方集官屬相與詢議乃有學官李宗義者出一函觀之於此文也嗚呼茲學創於秦公而已速不及視其成茲文創於高君而亦以去速不能勒之石今忽忽六七年使此官復有它故懷此文而去或不去乃有不幸而遭水火散失則前日之意將泯泯無聞矣將誰尤哉將誰尤哉因亟以此文屬今兵備副使景佐命工礱石鐫而立之子復綴此數語於末庸識立石之歲月而遲遲之故亦因以附見云

固原鎮鼓樓記

康海狀元

固原者陝西西北大鎮城也唐為故原州宋為

鎮戎軍元氏廢軍不制

國朝景泰中始設守禦千戶所以為苑牧成化初滿四亂因陞為固原衛後累置文武重臣守備故又設固原州而總制大臣居此以鎮凡榆夏甘肅諸鎮皆聽命焉正德庚午總制右都御史張公來不數年兵練事寧軍多暇日因便覽城雉及文武之署慨然興懷曰敝者不便則來者毋眠非所以作軍威明節制廣教習之道也是與總兵官具位楊公英謀諸文武將佐咸務聿新不侈近欲不廢後觀而兵備按察司副使景君實任其事諸既即緒乃又以鍾樓歲久頽敝不可獨廢勿理屬指揮施範因舊而增其基去壞以新其制作為重樓七楹東懸鼓西懸鍾規摹擴然大矣公曰斯不以利民望壯鎮城耶蒼是士大夫軍民父兄以學生徐尚文將幣來請記其事刻之堅石將聚父夫軍府大事非愚所及知也其鍾鼓之節凡陳皆統之司馬以告候省期蓋所當至急而無緩者州縣之吏能使更鼓分明尚驗其善治况雄軍大鎮樞轄要繫之地乎景君恢弘拓廣不勞力費財而又興其所宜興張公以經略大臣凡所可為者巨細皆至由其微以覘其著則所以安靖邊隅克張戎

服固非偶然也愚又安以辭為於樓崇二丈七尺臺如之而廣一十三丈厚五丈六尺皆以磚石圍砌其懸者又靖康時故鍾馬工起於正德壬申秋至此才一年已落成矣亦不足以視民乎張公名泰字世厚肅寧人景君名佐字良弼蒲州人

固原州行水記

呂柟狀元

正德乙亥鎮守陝西等處右軍都督府都督僉事平涼趙公文祇奉

制勅駐劄於固原州州井苦鹹不可啖醜汲河而爨水價浮薪朝那湫變及人部廬山左流淵

曰東海右流州曰西海西海大于東海湛澄且甘公及兵備副使景佐議導入州乃使都指揮陶文指揮施範帥卒作渠期月而成襟街帶巷出達南河過入州學匯為泮池池以石甃面起三梁于是農作于野卒振于伍商賈奔藏于肆士誦于庠學正李佐暨生員史瑋諸人走狀謁記柟惟易稱井養無窮先王以勞民勸相夫慈深者策遠見高者謀實幾明者敦本慈敵者重守流風積芳昔趙充國屯田湟中先零罕开坐困具降耿恭際危拜井而解蹕勒之園公斯之舉何可無之今天下大鎮五陝西有三然榆林

依紫塞寧夏負賀蘭甘肅盤合黎而據祈連總
兵各作一邊長城自堅萬里惟此固原雖裏受
敵實衆矧八郡咸維諸道攸通三邊一隙西寇
稀突漠漠荒莫可扼遏三輔為之震驚故元載
議城于至德曹瑋築軍于咸平忙可刺立路于
至元故將不作士遭敵必潰士不戀上作之弗
起士靡嘉賓驅之不戀公茲之舉可謂授干戈
于卒食納忠勇於士腹若夫誨孝弟視衣糧開
韜略杜侵漁簡什伍嚴法選器可由知也寢
朝廷西顧之憂誰云不然公初為平涼衛指揮
使受委都御史楊公募籍牧卒八百惟羨遂置
武安苑兼其敵功乃陞陝西都指揮僉事已而
守備岷州羌酋帖服乃充左叅將協守延綏中
路匈奴知名乃充遊擊將軍截殺花馬池滋樹
勲績乃駐劄河州洮岷既多墩臺亦講風俗威
德自近綏此番夷固原之業豈徒公耳初構筮
仕史氏識厥兄斌于御史宇岸洪遠心竊雅重
已而擢二京兆賦政益新由公視之當誰兄弟
也昔漢張奐段熲皇甫規嵩叔姪皆此西北人
物建功當時史策高之由公兄弟視之諸君子
難專羨矣公滋懋哉

重脩北亂池龍神廟碑記

平涼郡西北屬邑曰隆德曰開城兩界間有湫池闊一百七十丈深許不可測久澇不溢久旱不竭其下有龍神居焉能出天入地興雲致雨變凶歎為豐穰居民罔不欽仰焉世傳肇自春秋著顯漢世歷代加封享祀廟食茲土其來遠矣

大明正統壬戌暮春之季平涼府同知安本行部至彼時旱三月矣乃竭誠走謁祠下仰視舊廟棟宇推毀瓦片傾卸壁堵剝落誠不足以安神靈今祈或雨必卽脩飭心默許之口不欲言既而封羊設奠臨秋投羊首楮錢于中再拜跪

禱間其紙立沉而首泛汎然似不足意乃召祝問故祝曰神其或有所需曰我知之矣其首遂沒迺明告白神肯惠雨以蘇我民宜與脩廟已而祝禮甫畢各散去次日果大雨如注明日又雨四郊霑足豆麥復榮百穀播種邑官耆老胥吏者在洋之傍莫不懽忻健羨嘆曰是何靈應之速如是哉歸以質之郡長暨同寅舉欣欣然皆曰當報神惠于是各捐俸資倩工鳩材撤舊易新甃地以磚塗壁以粉左右侍從之儀繪其出入之像不日告成翼日二邑老父請紀其事具以言之予惟禮曰能禦大災則祀之能捍

國原志
大患則祝之茲神祝之靈異大有功於民如此
作廟奉祀于末世夫豈不宜哉故書以識歲月
云

兵備道題名記

唐龍提學副使

固原長壕大塹連山峻極四塞之接而襟帶之
固也秦屬北地郡漢及晉俱屬安定郡唐改故
原州至德中陷于吐蕃宋咸平建鎮戎軍元立
開城路咸平府尋降為州

國初府州俱廢成化五年用守臣議設固原衛
弘治十五年復設州建兵備而以按察副使領
之三十年于斯代者籍籍寢不可考嘉靖初成

君文質夫來攝其官布德揚武功用既興乃袁
各姓氏視次第勒于石而昭之爰命書其上方
子攬纒馮心軼周遊天府竊有以覲其形勝矣寧
夏環靈武之境延綏引朔方之圻甘涼結皇州
之壘共阻三面以扼南牧之虜而元戎甲士利
劔勁鍛罔不奮然延袤不啻數千餘里山川糾
繆而迤邐焉烽火不接聲勢斯携固原居中
而執其樞左顧則赴援綏靈右顧則迎應甘涼
擊常山之蛇以合左右之節逐中野之鹿以成
犄角之形固原實有焉今夫山豺狼所嗥狐狸
遊境日駭也虎豹負隅而踞之以張其爪牙則

百獸影滅卽採藜藿者不至矣是故奮直諫之
節者寢淮南之謀尚全勝之道者破先零之計
君子居朝廷則朝廷重居邊鄙則邊鄙重猶夫
虎豹之在山也固原之險山之嶠也兵備實司
其鈐轄而四夷之守在焉干城之托畀焉其可
不隱然為虎豹也乎人皆曰險在地而不在人
重在人而不在地斯固也抑人重則地得其險
而金湯足恃不重則地失其險天塹劔閣非我
有矣夫險亦在人乎是不可忽也雖然姓氏旣
載得失斯形由是重耶右昭昭然由是眇諸躬
而已焉石亦昭昭然君子雖欲不重不可得也已則
石固有砥礪之道乎杜詩曰他山之石可以攻
玉此之謂也質夫之意弘矣

平虜碑記

康海狀元

夫豐功鴻勳非淺計慧筭能建也故晁生獻策
於西京充國沈慮於羌虜非君臣和德于上未
之能成也

明興百六十年制馭夷狄之策殷周所希覩也
而近者猾虜襲套附邊之民歲被驅掠嘉靖丁
亥

詔起兵部尚書王公憲提督陝西三邊軍務虜
復入寇公曰嗟乎弦不更則音不調令不更則

士不奮虜所以敢長驅入寇者固以我為怯也
今不預為之計徒以坐待其歸而邀其後卽甘
謂非勇如百姓何於是下令文武將吏分部扼
塞訓練士馬廣其餼糧以待其至六月辛未虜
果由花馬及小鹽池拆墻而入癸酉抵鎮戎所
公乃遣中軍都指揮李佐洎都督鄭卿參將劉
文副總兵趙瑛李義統正奇兵萬餘往擊之虜
懼北奔卿等至細溝追及與戰大破之斬首九
十三級所獲馬匹器物無筭虜勢益潰諸將復
追至哲思溝又戰又斬首三十二級而所獲馬
匹器物益多是夜公飛檄調延綏都指揮卜雲

相機策應及調寧夏總兵官杭雄嚴督參協等
官魏錕沙金遏其歸路明日甲戌雲領遊兵徑
趨白羊嶺按兵待虜虜至與大戰斬首九十五
級值平虜守將李英率鄉兵喊殺虜後聲震原
野虜益大恐乃四散走佐與諸將選精兵來追至
五羊坊諸處會雄統錕及參將苗鑾遊擊將軍
夏欽李勳守備都指揮楊和迎虜勦殺共斬首
八十三級馬匹器物比白羊嶺所獲益多不可
勝紀而墜谷溺水及餓死者十之六七不在是
筭所餘殘虜僅百餘騎奔遁出境而已於戲公
之深計奇筭如此而猶不自居曰此邊鄙諸將

與鎮巡藩臬諸君子奉若

德意之功也其所上捷書深言兵備副使桑溥
練達變通規畫攻戰諸事雖公謙讓挹損如此
而桑君運籌贊襄之實亦可以槩見也其各守
分地協心追勦者有叅將袁聰操守都指揮任
傑協同王効通前斬獲虜首凡三百二十四級
云地方士庶咸請刻石以示永久蓋欲誦說
天子神武聖文知人善任故王公克綏厥事秦
比膚功揆之古昔雖孝宣之任充國弗能加也
海觀茲休盛實踰前聞有嘉厥請爰勒斯銘其
辭曰

維皇建極萬邦所望耀德邃古比蹟周商蠢茲
醜虜順叛靡常

皇赫斯怒九伐是張遴材選士其武湯湯起此
元老績揚踵芳匪怒伊教令不易行我士用奮
時維鷹揚天厭胡鷲欲滌其狂我馬旣同何需
不臧噎此羣醜細溝之傍迄及哲思益仆且除
返則值闕往顧速亡白羊之羸遂至五羊殘胡
宵遁號跳慘愴仰瞻

神武如雷如霆邊民說懌方內富強小大稽首
頌聲載颺

天子萬壽永綏四方外患旣殄內治彌康大夫

君子蓋思悠長循彼抑戒飭我戎行長子是率
淺慧是防翊我

皇度于虞有光敦彼古昔其道孔明我銘在石
諦思勿忘

平虜凱旋詩序

馬文升撰

平虜凱旋諸詩以都察院右副都御史項公蓋
臣克平逆虜滿四而作也陝右士大夫既為是
詩將勒石紀功用圖不朽以予與公同事兵間
不可無言惟昔元季有滿氏把冊者雄長西陲
國初輸誠欵附我
太祖高皇帝溥天地涵弘之德斥平涼回原裔

地俾之耕牧入隸版圖垂百餘年于今生聚日
蕃號滿家營有衆數千人皆驍雄善騎射歲以
縱獵山野逐獲禽獸為利而滿四其酋豪本名
俊人以滿四呼成化改元四禩固原守將嚮御
失德虜潛畜異鳩聚開城隆德靜寧安定內附
諸胡種及迫脅隣土雜居軍民而攘攷其馬騾
駝牛羊財帛不旬月衆至數萬據石城之險僭
署名號且密援外虜為應城距故營數十里遂
徙為家伐木結柵城上蒙生牛革以為固四面
陡崖深溝為東西門入道仰躋欹車騎不可城
列近城尤峻絕曰砲架山其次曰照壁山參錯

瞰道側削立千仞石磴攀緣由胡虜凹以登蓋
城最要害處虜守之引置木石其上俟攻至下
施飛擊中人必得其死虜嘗自語天設金湯雖
強敵數十萬無敢近先是虜徙城掘得前代行
元帥府事銅印每以是部署帳下羣醜火四火
能為腹心馬異南斗為股肱咬哥保哥為爪牙
滿能滿玉為羽翼選亮狡之徒制中命之器指
麾奪擊勢甚猖獗是年六月前巡撫陝西右副
都御史陳玠鎮守陝西寧遠伯任壽征西將軍
廣義伯吳琮叅將劉清發兵三萬薄城屢戰皆
大失利都指揮蔣太申澄死之遠近騷然事

聞

皇上渙起雄斷特

勅公為總督都知監太監劉祥為監督平虜將
軍都督同知劉玉為都統副以伏羌伯毛忠都
督魯鑑林盛叅將夏正劉清胡愷都指揮周璽
費澄蔣玉吳榮張英姜盛丁鐸黃瑀鄭英鄭雲
神英陳晟苗玘孫璽楊以羅敬皆為偏裨率京
師及三邊馬步精兵八萬有奇七道進攻環石
城山谷為營陣監軍則太監秦剛巡撫則右副
都御史王銳暨予鎮守則都督白玉叅謀則御
史鄧本端巡按則御史任佐江孟綸督餉則戶

部員外郎張賑紀功則兵部員外郎劉洪至若
分給諸營則右布政使余子俊參政于璠朱瑛
龐勝參議嚴憲崔忠按察副使宋有文鄭安僉
事胡欽胡德盛皆罄力協心佐襄厥務節度攻
取悉惟總督公成筭為進止公昔節鎮關中素
有令望奇謀偉略其出無窮持重周悉必求萬
全自環營凡三閱月大小數百戰伏羌伯毛忠
都指揮周璽費澄戰死公與予輩親冒矢石屢
屢衝突不能動嘗呼虜酋布宣

朝廷曠恩以招徠之終恃險反覆靡常我師每
以久暴露為憂公議曰彼烏合之衆利在速開

不能持久吾將堅陣以待其敝既而購募得敢
死士數千密間謀出奇計斷其水道燔其積聚
城中食盡人馬多渴死虜窮感挑戰尤數由是
麾七路兵并力鏖戰首獲滿四至中軍降其悔
禍者數千餘黨猶乘城跳跟或羣出山谷延喘
為暴衆兵鼓憤屠城大索山間斬首萬餘級橫
尸遍野生獲者萬餘婦女童稚孳畜不可勝計
洒掃巢穴邊境用寧十有二月班師將獻俘于
朝厥功可謂盛矣此平虜凱旋詩信不可無作
也詩凡若干首衆體咸備掄揚

國家威靈克集大勳皆董師得人所致焉嗚呼

克敵制勝莫難於用兵紀功述德必由于詠歌
昔周王選從出狩則南仲仲山甫南征北伐則
尹吉甫方叔召虎史氏書之詩人詠之豐功盛
烈萬世罔墜今公文武兼資功在社稷推校周
臣殆不多讓播之歌詠施諸後世其猶今之誦
周詩歟是宜歷叙梗槩以弁其端也已

西征紀行詩圖序

劉天和巡撫都御史

維正德迄嘉靖戊子西戎土魯番者弗靖累入
邊地議者謂宜閉關絕貢謂宜遣使往和莫能定
上從輔臣議起大司馬晉溪王公節制全陝諸
軍經略邊事公乃渡河而西首曰順則撫勿過
撫以納侮逆則拒勿深拒以窮兵且戎當以誠
感非可以計屈也絕貢非宜往和非體乃集前
後戎使之被留者將盡遣之邊人曰戎其遂輯
矣乎公曰未也訓爾士馬飭爾器具戎之情猶
未通也乃親將而西戎果悉衆控至將士爭奮
即日敗之追奔百餘里邊人曰戎其既定矣乎
公曰未也謹爾烽燧脩爾城郭備爾儲蓄戎之
心容未格也寧惟自治而已矣乃臨嘉峪登絕
塞械戎使之近至者以示威縱他使之願歸者
以示信大閱諸軍以示武戎聞之且懼且悔遂
遣使款塞蓋冬閏十月十有二日也於是文武

吏士歡欣慰藉相與慶且頌曰禦戎之策惟戰與和而已一於戰者適以招釁而未足以服遠人之心一於和者或以納侮而未足以懾遠人之氣公之始也一主於和而其卒也不忘乎戰至於嚴自治以守則又出於戰與和之外者蓋其歷覽周詢之餘深察夫彼我之情而馭夷制敵之略則又素諳累試已效之策故其定謀審計張弛開闔元戎宿將仰受成筭若莫能窺其際者及其至也舉莫能違是豈常情拘泥偏狹僥倖一時者所可企及其萬一扒然則公是舉也仰副我

明天子神武不斂之仁以全我

中朝柔遠之體以紓我邊人防禦之危若是其冒怙西土之績固有求懷無斃者矣按察副使李君淮緝公經行題詠繪圖以贈公曰此予西征紀行錄也爰屬天和次其語於篇端

賀平土番序

康海狀元

國家封哈密為瑜關以西之外藩當時哈密既強又受有

天朝顯封諸番莫敢抗也逮成化弘治以來土魯番強盛諸番奪哈密逐其君積六十年漸不可制

孝宗皇帝雖嘗命文武大臣與師問罪搏其巢穴矣王師比還而驕悍如故賞之不厭其心威之不致其畏固亦執事諸公之過也何也

國家以一統之盛臣服萬方土魯番雖強竊據西北一席之地而叛服不常如此我義未直兵則何畏彼求方劇予則何恩是以信義不行綏靖無法徒厯廟堂籌顧之憂無補疆圉侵凌之患而中朝士夫又重聲譽而略綜核騰口說而賤事體故乞蹈者少浮夸者多遂使生靈厄於原野轉輸極于道塗非執事諸公之過哉今天子嗣大曆服起前少師吏部尚書晉溪公于

戎伍改兵部尚書授以節鉞總督茲事公至於邊方重臣於帷幄而論之曰中國之於夷狄固不可過撫以納侮亦不可深拒以窮兵唯順則撫故賞斯恩焉唯逆則拒故威斯畏焉諸君歷事既久顧不足以知其故乎回鶻賈胡耳仰華夏以為利藉黃虜以厚生往昔侵方物而絀信義勒貢獻以啓釁尤吾輩固不仍乃仆足矣曷求所以固圉息兵之道乎乃出其羈使納其貢夷擊窺俟之姦輸歸土之論於是混淆者革扞格者通方物無措克之虞勘報無稽留之苦觀其籲天改過遣使獻城則夷情大悅夏德丕宣

可知矣六十餘年難制之虜一旦以笑談決之固信義無紕於我而恩威允叶其心云爾當時執事諸公何獨不若此哉嘗見甘肅鎮巡挽留之疏謂公是非可否每明辯於經畫之時成敗利鈍不取必於智謀之末敢於任事而行人之所難行善於應變而決人之所難決遂能展布四體康濟一方斯實錄矣厥功既聞天子嘉之甘肅鎮巡諸公因父老感激之意地方寧謐之餘徵文賀公予不佞故卽當時之事所私見者與公之所已行者叙之後之觀者倘有取焉亦可以知國家之長計矣

元老靖邊詩序

王九思翰林編脩

太子太保晉溪王公先以兵部尚書兼都察院右都御史總制陝西邊務開府固原於時土魯番貢職弗脩屢抗我師為禍甚大貽

朝廷西顧之憂公曰土魯番舊稱臣久第御之失宜故至此我其撫之撫之不聽然後有以為彼亦無辭可稱說也於是撫之果降脩貢罔敢或爽先是各鎮士馬各守其地不相及北虜往往竊入我境拒之則無人覺而逐之則有甚不易者公自畫以各鎮士馬凡虜可入之地分布之以拒其入謂之擺邊以語諸巡撫諸公訪於軍

中老而諳事者咸以為不可公嘆曰吾畫已成第俟之可萬全無事已而果然於是邊人頌之以為降土魯番者詢謀僉同公之雅量也或可學也至於擺邊之策神識妙智公之才不可以學而能也於是關中士大夫聞之作為詩歌之紀其盛題曰元老靖邊云涇陽進士穆君文英走使鄴柱下屬九思序之夫六月之諫平儼貌也采芑之作服蠻荆也由今日視之師不興於六月士無事於采芑而邊靖焉則夫嗣遺雅之音以流於萬世者宜何如哉宜何如哉公昔為吏戶兵尚書歷事

西朝忠君為國之心終始一節今將入侍聖天子為四海致太平盛德備續紀之太常備諸國史蓋不止於靖邊也

靖邊詩序

段冕翰林檢討

周大受者其惟才乎受大而事成以有功焉其實有天下之才者哉若是謂能副天下之望以卒有令聞於天下實不充者吾未見終其聞者矣則名為掩取為朋與為昵好古今成少而多債可獨曰數半則人歟若夫遇而弗任任而弗專是則非臣之有晉溪王公用起荒遊

注上卽以全陝西三邊命公總制於時土魯番

恃遠叛命侵據屬國三十年餘爾乃發兵掠寇
破城沒軍五州驚擾其逆甚矣而北虜踰河入
套縱牧朔方乘伺內掠竭我孳稼屠累華衆亦
三十年餘

宵旰之憂二者日新公節臨關中則嚴飭將領
受筭禦渴邊烽頓息遂仗鉞移節至五郡君夷
使宣示威討恩信並布未幾而夷譯連至悔逆
請罪輸表受降矢已而套虜聞公有事西北時
試南入公復還軍駐兵當塞策謀神變強弱互
示聲實莫測虜精捍驍騎入則俘刈全獲於是
移營帳近河計求北渡內郡廬產以得寧居而

公行厨或至藜藿不充昔歐陽公言韓魏公垂
紳正笏不動聲色以措天下於泰山之安此指
當時人主不親政事言也而魏公在邊西賊聞
之膽寒魏公才兼文武故能出將入相以成安
攘之功往者

武皇符駕未息投奏蔽覽禁榻虛陳都人莫倚
宇內惶怖公適主本兵保障城關以奠定都邑
而範圍諸邊戰守不惑於今功見於靖邊又如
此以較魏公事矣二耶異時人見公奏牘公移
其文章其規畫莫不稱頌膾炙走於今果見公
有天下才而副天下望也陝西巡撫寇公首倡

詩以頌公靖邊功凡仕於陝藩臬諸曹皆為詩以頌其受命存其簡不敢辭

平夷退虜賀狀

唐澤州巡撫都御史

恭惟奉

天討虜仗鉞臨邊飛蓋入關旌旗色變左司傳令士卒氣增范老留中甲兵素定馬公望重夷虜咸知土番六十年反覆之寇也盜者勦之以挫其氣羈者遣之以服其心貢者納之以釋其憾笑談之間西戎稽首套虜數十年猖獗之寇也集兵扼衝懲夫散守之失出奇斬馘示以必戰之威斂緝邊氓俾無可乘之隙指揮一定北

虜遠遁竊觀漢二師勦數萬之衆歷數年之餘僅得宛馬數匹議者病其窮兵陳湯鼓番夷之衆斬酋虜之首雖云立功西域當時論其矯詔今日不遺一矢不勞一卒聲罪致討而

朝廷尊信義執言而夷虜服視二師陳湯何如哉唐太宗與突厥盟於便橋自謂得策然彼已深入畿內不免城下之羞子儀單騎見虜世所共稱然彼已飽載而返不免孤注之危今日聞風騰落遠徙窮荒耕耨不變於郊圻塞馬長鳴於塞野消不測之患於隱然之中視太宗子儀何如哉蓋由明府於天下之理知之無不明故

遇天下之事處之無不當豈直平夷虜一節為
哉

聖天子益重北門之托大翰西顧之憂下

詔褒功進秩宮保行將拜麻紫閣霖雨蒼生措
天下於泰山之安定華夷於一統之盛為生民
造福為吾

皇致太平區區二虜平定又足云乎哉職等偷
安邊閫共荷大厦之仁憂抱杞人益切大車之
望徒知感德難罄私衷帛箋箋縷并誠而冀
台鑒寸心耿耿做野史以鳴鴻功顧復限於職
守實迺愧夫多儀萬惟包荒靡頓不勝萬感

設險守邊大省勞費奏議 王瓊

臣聞防邊之道莫善於守莫不善於戰昔周王
命南仲城朔方而獫狁之患除秦始皇命蒙恬
將兵攻胡而天下叛是戰與守二者利害得失
相去遠甚不可不早辨而預謀之也今寧夏花
馬池一帶地勢平漫周宣王時獫狁內侵至于
涇陽漢文帝時匈奴十四萬眾寇朝那蕭關殺
北地都尉唐太宗時突厥十萬寇涇邠至渭水
便橋之北本朝弘治十四年以後北虜深入固
原臨鞏平鳳等處皆由此地而入雖曰築有邊
牆一道低薄易毀又離花馬池二十里每賊大

舉拆墻入境官軍閉門莫敢攖其鋒弘治十五年兵部議奏始

命戶部尚書秦紘總制陝西延寧甘肅四鎮軍務常在固原住劄離花馬池六百餘里自後任總制皆以調軍攻戰為務節年於內地開設衛所創建營堡括一省之兵募未耕之民以足軍伍冗食坐費者常至二萬餘人又調延寧甘肅三鎮之兵入內應援地里益廣兵力益分虜每擁衆深入縱橫殺掠分散之兵益不能禦我民大遭荼毒彼賊略無懲創而徵輸調發財殫力屈小民日益流徙戶部經用告竭皆由用戰不

用守其弊遂至於不可救也正德十年臣任兵部尚書奏革總制不設者六年勞費大省嘉靖七年荷蒙

皇上起用臣總制陝西三邊軍務去年大虜住套臣親統精兵三萬赴花馬池要害賊衝沿邊擺列振揚軍威虜賊拆墻入者輒擊斬之遂移營遠徙幸無深入屯兵凡四閱月費用芻糧亦且數萬臣因思屯兵拒戰終不如設險拒守遂會巡撫巡按官議奏乞於寧夏花馬池延綏定邊營相接地方挑挖壕塹防護鹽池以通鹽利

荷蒙

皇上採納准行今年七月延綏西路管糧僉事張大用寧夏管糧僉事齊之鸞各照該管地方興工挑挖共長四十二里其定邊營南至大山口長二十里先年巡撫都御史余子俊築有墩墻年久損壞該兵備副使牛天麟脩補挑挖計至十月地凍之時可完臣親詣閱視中間土脉好處挑成溝塹真如天設之險足堪保障比之築墻工省數倍而為利無窮但花馬池西北至安定堡四十一里安定堡至興武營四十八里興武營至毛卜刺二十四里毛卜刺至清水營二十八里清水營至橫城堡大墻二十五里通

計一百六十六里必皆挑挖溝塹方無空隙東南自定邊營大山口起西北至寧夏黃河止中間平漫之地皆有深溝高壘惟用步卒拒守而虜騎不得長驅雖費銀十萬亦不為多以後得省調兵無窮之費固原諸路新集之兵可漸撤罷而平鳳臨鞏之民不遭驅掠得安枕席即今塹內人畜遍野無望煙之警數年之後闢草萊為膏腴變荒塬為樂土又不獨減省調兵勞費而已及查慶陽府靈州鹽課司所管大鹽池舊屬延綏管糧僉事兼理小鹽池屬寧夏管理二池相離二百餘里後改慶陽兵備副使兼管相

離二池六百餘里顧理不思每年十月初為始
不許支鹽謂之封池次年三月河開方許掣放
原定二池額課每年共一萬四千引今年大池
止放過鹽三百餘引節年未支商鹽共二十餘
萬引大約十年方可支盡所以自嘉靖五年至
今五年鹽課無人報中今既挑完溝塹鹽利大
通宜令延綏西路管糧僉事照舊兼管大鹽池
寧夏管糧僉事兼管小鹽池十月以後不必封
池俱召商報中行慶陽府造冊送布政司領引
赴池支鹽每引舊例納銀二錢五分以引銀一
錢共三錢五分照依時估定立斗頭於附近花

馬池定邊營等倉上納本色米豆以前年分該
支商鹽照舊揆支各不相妨如此虜患既除邊
用亦足誠大利益臣又惟興舉事功在於得人
鼓舞智能當行激勸竊見寧夏管糧僉事齊之
鸞歷官中外幾二十年持身無玷臨事有為延
綏西路管糧僉事張大用年力精強才識通敏
脩邊之任俱堪委托先年都御史余子俊因脩
邊有勞與首功同論廕子世襲指揮僉事近日
肅州兵備副使趙載因整飭邊備勤勞超陞右
僉都御史伏望

聖明留神裁察臣所陳戰不如守便益事理果

有可採持

勅兵部再議無碍奏行延寧二鎮巡撫都御史
責委僉事齊之鸞張大用各照地方提督脩理
內已成未堅完者務要脩理堅完未成者照已
成溝塹挑挖合用軍夫於隣近城堡并備禦軍
內起倩照舊每名日支口糧二升仍每十日犒
賞銀一錢資蔬菜之用定邊營一帶照都御史
余子俊舊規每里築一墩仍於東中二路摘撥
備禦軍八百名每墩定撥二十名花馬池一帶
量地遠近立墩就於河東原設備禦軍內那撥
各令常川看守但有損壞隨即脩補每年二八

月起夫脩濬一次務使堅完經久每墩蓋鋪房
一座以為守軍棲止合用工料價銀寧夏查取
固原州庫延綏查取慶陽府庫各收貯以引銀
兩支用如有不敷聽於鹽池召商納價或折納
木板轉用工完停止靈州鹽課司大小二池鹽
課如臣前擬行各管糧僉事各照地方兼理開
中工完之日將脩完工程丈尺脩蓋過鋪舍支
用過銀糧數目造冊送各巡撫都御史奏繳僉
事齊之鸞張大用果能經理得法足堪保障大
省勞費事有成效各巡撫官具實奏
聞厚加賞賚不次超擢以為忠勤之勸如或苟

簡虛費工力不堪保障叅奏究治

設重險以固封守奏議

王瓊

臣兩出巡邊知延綏定邊營寧夏花馬池一帶地方為套虜入寇陝西之路已經建議挑挖深溝脩築高壘設險拒守以省勞費另題外又知花馬池之南固原之北環縣地方東至榆林神木堡黃河西至蘭州黃河綿亘二千餘里中間山勢連絡皆可設險成化八年巡撫廷綏都御史余子俊脩理榆林東西中三路邊牆年久損壞不堪保障自環縣迤西嚮石溝起至靖虜衛止係固原鎮該管邊界弘治十五年總制尚書

秦紘脩理墻塹低淺今已坍塌填塞套賊節年過花馬池由此深入不能阻隔臣委叅將苗鑾督同守備趙景操守黃振親詣各該地方踏勘得東自環縣地界嚮石溝起西至靖虜衛花兒岔止共長六百三十六里內靖虜三十八里九分固原一百二十五里二分原有邊墻坍塌工程頗少令各衛自脩外其餘靖虜該脩四十里三分固原該脩三十里五分俱工程浩大相應借倩軍夫挑脩大約計筭該用夫八千三十餘名又踏勘得有山去處通賊隘口五十二處回報到臣行令依擬脩理外近據鎮守陝西署都

督僉事劉文開呈本年八月初三等日本職督
同遊擊彭械統領官軍王銳等八千一百四十
三員名親詣固原邊境分布設伏防禦套賊一
面興工脩邊先將衝要下馬房東嚮石溝一帶
損壞舊塹三十里五分俱挑深二丈闊二丈五
尺南面塹上築牆共高三丈頗堪拒虜及將下
馬房西接平虜鎮戎紅古海刺都西安州五堡
坍塌邊塹共長一百二十五里二分俱隨山就
崖剷削陡峻至九月初三等日前項工程次第
脩完本職仍統前項官軍親詣乾鹽池一帶將
衝要青沙峴等處原剷山崖溝塹日久崩頽共

長四十里三分挑濬剷削深險壯固及將乾鹽
池打刺赤靖虜衛三處坍塌塞崖塹共長三十八
里九分工程不多著令守備趙景督同操守等
官自行脩理俱於十月初三等日次第工完套
賊聲息稍寧呈蒙軍門明文回兵固原外通查
固靖二處共脩完衝要地方牆塹七十里八分
剷削崖塹一百六十四里一分臣自寧夏回過
下馬房看視劉文所脩牆塹如果高深足堪保
障切照鎮守陝西署都督僉事劉文領兵八千
出備北虜旣振戰伐之威因為固守之計兩月
之間脩完二百三十餘里要害之邊塹山湮谷

而得因地之利深溝高壘而設重門之險比之
斬獲首級損軍費糧者功似為優况本官征進
洮岷斬首數百巡按御史造冊奏繳該部尚未
議陞如蒙特

勅兵部查照節年大同延綏等邊鎮巡官脩邊
陞賞事例議擬奏請取自

聖裁合無將劉文量加陞賞或准與實授以為
守邊將帥之勸再乞行延綏鎮巡官查勘先年
巡撫都御史余子俊原脩邊墻溝塹修理

甘露降固原奏

王瓊

嘉靖十年閏六月下旬固原總制衙門堂後柳

樹忽然枝葉光潤如油每曉霧氣蒼鬱津落於
地疑膩不散以盤承取嘗之其甘如飴見者異
之皆謂甘露之名雖聞未嘗親見今柳上膏液
是否甘露無可証驗數日後固原州儒學內柳
樹亦生膏液異常又數日城外官民等家都指
揮僉事王佐等園柳樹枝葉遍生膏液疑聚成
珠飴甘肪白多至十數株鎮守固原都督僉事
劉文帶管固原兵備副使張欽公同固原州知
州趙承祖固原衛指揮劉東親詣各家園內看
視取嘗果係天降膏露非由人為令人以匙刮
收貯於瓶內該都督劉文謹封上

進外臣聞太北有星名為天乳若明潤則甘露
下降又

王者德格于上恩覃於下而後斯瑞乃應今固
原州卽古涇原之地世為夷狄所侵害仰惟
皇上慎重邊備詢謀輔臣既

命兵部選將練兵設險戰守又

命戶部經畫糧餉務在充足今套虜不侵固原
已三年矣耕者黍稷蓋藏牧者牛羊被野人得
樂生和氣上達

皇上仁德昭格於

天是以甘露降於固原以為休祥之應也臣等

何幸身親見之臣又聞孔子作春秋祥瑞不書
而有年則書誠以天道玄遠難知而人事則可
徵實今陝西之地邊患雖若寧息而西安等府
天旱民飢流徙者衆伏願

皇上以甘露降祥而感

上天以乾旱為災而恤下民急遣

廷臣大施賑恤省刑薄賦尚禮興仁將見人心
和於下則天道應於上而諸福之物可致之祥
無不畢至矣豈獨甘露之降哉

明固原州志卷之二

臺灣國家圖書館, NATIONAL CENTRAL LIBRARY, TAIWAN, R.O.C.

